


張
燕
公
集
二







A decorative border with a cloud and horse motif at the top. The border consists of a thick black line with intricate white scrollwork patterns. At the top center, there is a stylized illustration of a horse in profile, facing left, with a rider or figure on its back. The horse and rider are set against a background of swirling, cloud-like patterns.

張 燕 公 集

(二)

張 說 撰

張燕公集卷九

表

請許王公百官封太山表

臣說等言。臣聞聖人者。與天地合德。故珍符休命。不可得而辭。鴻名盛典。不可得而讓。陛下功格上天。澤流厚載。三五之盛。莫能比崇。登封告成。理協幽贊。故符瑞必臻。天意也。書軌大同。人事也。菽粟屢登。和平也。刑罰不用。至理也。今陛下稽天意以固辭。違人事以久讓。是和平而不崇。昭報至理而闕薦祖宗。億兆之情。猶知不可。況上帝臨照。祖宗顧諟。其可止乎。願納王公卿士列岳縉紳之衆望。迴命有司。速定大典。臣等不勝懇禱。敢昧死再拜上言。

請八月五日爲千秋節表

臣聞聖人出。則日月記其初。王澤深。則風俗傳其後。故少昊著流虹之感。商湯本元鳥之命。孟夏有佛生之供。仲春修道祖之籙。追始尋源。其義一也。伏惟開元神武。皇帝陛下。二氣含神。九龍浴聖。清明總於玉靈。爽朗冠於金天。月維仲秋。日在端五。恒星不見之夜。祥光照室之朝。羣臣相賀。誕聖之辰也。焉可不以爲嘉節乎。比夫曲水禊亭。重陽射圃。五日綵綰。七夕粉筵。豈可同年而語也。臣不勝大願。以八月五日爲千秋節。著之甲令。布於四方。羣臣以是日獻甘露醇酎。上萬歲壽酒。王公戚里。進金鏡緩帶。士庶以結絲

承露囊更相遺問。村社作壽酒宴樂。名賽白帝。報田神。上明元天。光啓大聖。下彰王化。垂裕無窮。異域占風。同見美俗。

請置屯田表

臣說言。臣聞求人安者。莫過於足食。求國富者。莫先於疾耕。臣再任河北。備知川澤。竊見漳水可以灌巨野。淇水可以溉湯陰。若開屯田。不減萬頃。化荏葦爲秔稻。變斥鹵爲膏腴。用力非多。爲利甚溥。諺云。歲在申酉。乞漿得酒。來歲甫爾。春事方興。願陛下不失天時。急趨地利。上可以豐國。下可以廩邊。河漕通流。易於轉運。此百代之利也。當今國儲未贍。邊軍未息。勸人農業。願留聖意。亦嘗賜前階之食。承後騎之顧。竟唯唯而無一言者。豈敢隱情於聖主也。正以職在仗衛。憂於部伍。馬上非公議之所。困遊非朝廷之事。今昧死上愚見。乞與大臣籌謀。速下河北度支。及溝渠使檢料。施功不後農節。謹附賀正使。隨軍前曹州考城縣尉同希再奉表以聞。謹言。

禮儀使賀五陵祥瑞表

右臣等。伏以陛下。孝通天地。親朝五陵。拜橋陵。則紫氣見。獲白兔。甘露降。白鴿巢。天光清和。日色明朗。拜定陵。則有景雲見。甘露降。拜獻陵。則甘露被樹。祥雲抱日。拜昭陵。則先聖見神遊。薦享之際。陛下親聞。歎息。初進服用。樂器自然發聲。又素像回面。甘露降滋。從祀先臣。歷聞蹈舞。拜乾陵。則有靈草生。甘露降。日抱戴之瑞。此皆陛下虔誠上感。神靈福降。四海同權。萬方忭躍。臣等幸陪大禮。親覩禎祥。無任大慶之至。

謹奉表陳賀以聞。臣說謹言。

集賢院賀太陽不虧表

太史奏太陽不虧。聖德上感。變災爲瑞。陽光增輝。陰慝不作。休徵之美。莫盛於斯。臣等無任欣忭之至。謹進狀陳賀以聞。謹進。

賀大衍歷表

臣說言。伏以開元大衍歷。天旨裁其紀綱。日官考其精要。履端更始。敬授維新。加以辨五行之序。推七精之數。明徵聖期。寔光上德。臣又見梁天監中。陶宏景著玉匱記云。盛德木子。以肇來運。頃者。僧一行推璿衡歷。得皇家天命。成數千年。古今祥兆。若合符契。歷數既在於聖躬。卜年又表於長歷。莫大之慶。獨冠前王。臣忝跡儒林。預聞昌運。無任抃躍之至。謹奉表陳賀以聞。

賀示歷書表

臣說等言。內侍尹鳳祥至。奉宣聖旨。內出新撰歷書二十五卷。以示臣等。竊窺深奧。仰觀英華。涉海登山。罔知攸際。臣聞唐堯光宅。順昊天而定四時。虞舜登庸。在璿衡而齊七政。伏惟開元聖神皇帝陛下。至德廣運。文明濟哲。道冠生知。與神合契。備往聖之能事。紹昔王之盛典。發揮易象。以應乘乾之時。考正歷書。更表履端之始。上包二帝。下括三王。徵晷運之盈虛。究推步之疎密。備稽氣象。載躔坎離。三辰順軌。而更明五緯。合度而增煥。是使天地貞觀。神人允諧。唐虞舊章。於斯重覩。臣等幸陪書府。得預朝門。抃躍之情。

實萬恒品奉表陳賀以聞。

賀祈雨感應表

臣說言。臣聞水旱常數。堯湯固有。聖賢之理。恭潔爲難。自冬踰春。積陽成亢。陛下以時災繫政。人患由君。退巫女之等。却應龍之請。陛下躬自暴露。炎景瞻仰。雲漢推心。引譴爲人受咎。誠旣發而動天。言尅期而降雨。今已霖霖三日。澤漏重泉。草樹含欣。郊原變色。加以雲平雨細。氣潤風和。豈惟優渥。王畿必將周遍。天下羣心舒釋。聖情開暢。無任萬姓歡悅之至。謹奉表陳賀以聞。

讓兵部尙書平章事表

臣說言。伏奉九月十九日制書到并州。授臣兵部尙書。同中書門下三品。王人在門。驛騎臨路。奉恩循分。以慙以惕。臣說中謝。臣早以書生射策。載筆聖朝。晚以軍誌典兵。秉旄乘塞。祿非授進。寵是宸衷。久侍玉階。四掌綸誥。一心好直。三黜其宜。今復用之。猶夫人也。何足以舉明邦政。光緝帝猷。更策疲驂。來塵法駕。又臣已受命司籍。專意簡書。所希散冗。因閒就業。忽叨劇職。責大憂深。人心有限。事難兩濟。國史無成。臣執其罪。上思薦賢以自代。下願守分以全節。竊見開府宋璟。清介獨立。倚法而不回。詹事陸象先。清明向道。臨事能斷。其高明有素。歷朝之所仗委。其積行無疵。家人之所體信。揆停住任。未盡宿誠。乞迴此恩。以納來効。必能補舊政之缺漏。廣前途之軌轍。雖深心用力。臣頗與二子齊驅。然校德考年。彼皆有一日之長。天下者累聖之公器。宰相者萬方之具瞻。臣所以廷讓彰言。不陳密啓。伏願聖恩。聽輿論而舉衆望所矚。

倘朝任得人。實海內幸甚。無任力微任重。惶懼之至。謹奉表陳讓。

讓封燕國公表

臣說言。伏奉今月七日制書。封臣燕國公。食封三百戶。寵靈猥及。中心如慙。臣說中謝。臣聞至道之時。重法守義。上無無功之賞。下無無德之祿。故授受禮全。而踰越不起。伏惟陛下。光撫宇內。大寧天域。百度維新。萬靈翹注。建侯疏壤。允答元功。臣亦何人。首膺是命。自古有道而爵。說經而封。蓋以訓蒙成聖。資師通學。臣之侍講。有異前聞。何者。大明朝昇。螢燭無助。時雨夕濡。浸灌焉施。幸得依附光景。游泳渥澤。豈敢虛承。啓發之恩。謬荷將就之報。且如人臣之義。二則爲罪。一心不回。愚知之分。譬如犬馬。有不背之性。草木有不彫之理。知何德於天壤。而欲蒙造化之偏施哉。臣之無功。正與此類。叨恩過量。終懼且慙。乞迴聖慈。以容介節。無任惶悚之至。謹詣朝堂奉表陳讓以聞。

讓中書侍郎表

臣說言。伏奉制書。除臣中書侍郎。寵命俯臨。驚魂自失。臣說中謝。臣聞雲構鬱起。非枳棘之任。天波暴集。寧溝澮所容。臣識無通方。文不經國。南宮華省。已忝前行。西垣內閣。將陪近侍。心慙官謗。跡愧時流。何以承掌主言。贊決機務。當今二儀再造。百度皆新。太平之基。惟賢是與。混成庶政。責在中書。豈以常才。敢膺首選。乞寢恩命。改擇時髦。惟慎庶官。以諧僉議。無任惻款之至。謹詣朝堂奉表陳讓以聞。臣所讓人。別狀封進。

讓右丞相表

臣說言伏奉制書除臣右丞相兼中書令臣學慙稽古早侍春官階緣舊恩忝竊樞近雖思致君堯舜而才謝伊臯屬升中大封方求俊乂猥升端右實愧朝行乞停新命獲守舊職辭納情懇希垂察諒無任屏營之至謹奉表陳讓以聞

第二表

臣說言伏奉今月十日制書除臣尚書右丞相恩命自天戰跼無地臣說中謝臣少長儒門墾鑿墳史才非高格官不因人徒以命偶龍興位階鴻漸五入西掖七踐南宮中間拙延謫放直招玷缺傷矢之禽聞弦虛墜賜環之客聽歌先泣此則魂爲危感氣由懼奪安可重收廢器再辱端揆何以師長禮闈正持憲府當今典章革故風教鼎新野無四隱朝有三傑具瞻之地願擇時髦臣幸沐遺簪墮履之恩好生養志之德朝遊簡牘暮對圖書受賜無涯循榮過分豈更干處士之橫議招匈奴之遙哂艾骨自瘡負乘致寇雖則恐情懷戀覲冒求寵亦望聖慈限約令度餘年願停今授長守舊史罄陳肝膽非敢飾讓謹詣朝堂奉表自乞臣說誠惶誠恐頓首頓首死罪死罪謹言

讓中書令表

臣說言伏奉今月十一日制授臣中書令恩渥自天震越無地臣說中謝伏惟陛下至孝安親大功定國六合翹首庶政惟新雍熙之化望在茲日中書理本臣叨首名將何以翊贊聖君光澤天下自臣攝官禁掖

已涉七旬。不知賢才以舉。是不仁也。不辯不肖以退。是無勇也。何足以備乎宰臣。胡顏冒恩。復受真拜。臣之愚執。正在於此。不敢繁詞。以塵聖聽。乞迴榮授。改擇時髦。無任懇款之至。謹詣朝堂奉表陳讓。以聞。臣所讓人。別狀封進。

讓平章事表

臣說言。臣伏奉宣旨制書。以臣同中書門下平章事。承命戰汗。拜舞失容。臣說誠惶誠恐。頓首頓首。死罪。死罪。臣本書生。器識凡近。仕不望於通貴。祿只宜於代耕。蒙時寵榮。越踐臺閣。局心守職。竊所庶幾。長算經邦。則無逮及。伏以廟堂寄切。軍國務殷。循涯審分。非臣攸處。爲國者。爲官擇人。爲臣者。陳力就列。若志小謀。大力微任。重豈敢顧。惜微軀。實恐上塵王政。是以披露肝膽。不暇飾詞。乞停此授。俯遂誠情。無任怖懼慙惶之至。謹詣朝堂奉表陳讓。以聞。

讓起復除黃門侍郎表

草土臣說言。臣私門凶咎。喪紀未終。不自毀滅。苟存聖代。忽降制書。復臣工部侍郎。尋奉後命。授臣黃門侍郎。震駭失圖。哀怖殞絕。臣說誠惶誠恐。頓首頓首。死罪。死罪。臣弱年早孤。母氏訓立。得紹基構。忝列簪裾。從官歷年。晨昏多闕。播遷遠裔。離別又苦。顧復無答。報養何追。心所摧感。語不能喻。甫至冬中。禮及祥禫。今已春暮。瞻言幾何。是臣事朝廷日長。戀几筵日短。乞寢嚴命。許達私情。訴衷祈天。所望矜遂。無任荒迫之至。謹朝詣堂路左奉表。乞哀。以聞。謹言。

第二表

草土臣說言臣在疚承榮布哀陳歎精誠無感天睠未廻假喘殘生悲懼轉集臣說誠惶誠恐頓首頓首死罪死罪臣聞苦者不覺聲哀窮者貴其言達情有至切辭無敢隱臣爲少子慈愛所鍾每一離別輒加憂憫況臣生年多故違隔私庭終堂之日身限公事存旣數違左右沒復不畢几筵痛心自傷特殊人類臣今望延數月企及再期乞恩無多報國非晚冒死重請冀蒙哀遂無任懇迫之至謹詣朝堂路左奉表陳乞以聞

第三表

草土臣說言臣荒喘窮情再瀆旒屐懇誠不到未感天心誓將冒死祈恩分外謝中臣本書生門非代祿數葉單緒族無親房臣父遭憂曾祖未葬臣有兩兄一妹甥姪九人又有中表相依尙成百口吉凶衣食待臣以辦臣今拜職黃閣侍奉丹墀厚祿清班一朝改官舉宗榮賴爲幸過甚人情所欲豈合稽恩正以焚苦心有所未盡臣亡母在日朝夕誠臣以臣獨立無徒好直多忤知子者母果驗所言往罹大獄竄命炎海晨出晚歸貽慮非一況涉危難傷心幾途追計生平倍增摧慕侍養日少違離日多卽臣母憂臣以終身臣其忍服縗以從事情旣不同常例望在特降殊恩臣先患風緩近加虛瘵陛下倘從臣數月容過再期非但寬其哀疚固亦全其生理亡身報國庶竭後圖木植有性枉之則折人願在心違之則苦雖強爲用將何以堪銜泣仰天冀蒙哀允無任懇迫之至謹詣朝堂路左奉表陳乞以聞

謝觀唐昌公主花燭表

臣說言內侍尹鳳祥宣勅賜臣觀唐昌公主花燭。伏以天人下嫁，王宰送行，苟非榮寵，何階瞻望。臣免歸餘叟，忽承朝請之恩，廢駕羸驂，復覩肅雝之禮。鴻私所被，枯瘁生光，無任歡荷之至。謹奉表陳謝以聞。

諫內宴至夜表

臣聞上天示下災祥，將以誘導人主。先王仰觀休咎，亦以順修政教。易曰：天垂象，聖人則之。言天人之際，感通必矣。臣伏見去年十月十七日，月滿猶望，應虧不虧。今月十七日，亦未少虧。此易常之異也。夫月者，至陰之氣。臣下之象，當助天作明。順期盈缺，若過盛逾時，盈縮乖度，得非臣下之咎。而上天之誠耶。伏願陛下深察熟思而預防。臣又見近日內宴，夜深方罷。小臣無識，抑所未安。王在在鎬，凱樂飲酒，此誠大雅之美也。臣卜其晝，未卜其夜。此蓋春秋之義也。伏願陛下宴樂之餘，不及於夜。臣職忝補闕，昧死陳愚，謹言。

進鬪羊表

臣說言。臣聞勇士冠鷄，武夫戴鶡。推情舉類，獲此鬪羊。遠生越雋，蓄情剛決。敵不避強，戰不顧死。雖爲微物，志不可挫。伏惟陛下，遷良家於六郡，求猛士於四方。烏無遁材，獸不藏技。如蒙効奇靈囿，角力天場。却鼓怒以作氣，旋躑躅以奮擊。跌若奔雲之交觸，碎如轉石之相叩。裂骨賭勝，濺血爭雄。敢毅見而衝冠，驚狼聞而擊節。冀將少助明主，市駿骨。揖怒蛙之意也。若使羊能言，必將曰：苦鬪不解，立有死者。所賴至仁。

無殘量力取勸焉。臣緣損足。未堪履地。謹遣男駙馬都尉埴。謹詣金闕門陳進。輕冒宸嚴。伏深戰越。

進佛像表

臣說言。去年行塞至朔州。忍辱尼寺。見有高祖太宗造金像銀趺。刻題尊號。彼州士女。屢瞻佛光。臣懇思聖心。如在咫尺。伏以皇帝事業。遠存荒塞。拯溺救焚。身勤慮苦。歸誠佛寶。何神不據。信知功遍區域。澤周生人。心憑神靈。躬履危險。故皇天眷命。奄有邦家。後嗣聖人。欽承大寶。所當思由積德。而興帝系。本艱難而成王業。先聖一心奉佛者。蓋爲百姓求福也。陛下爲繼文之主。實創業之功。再廓氛祲。重安廟社。垂統萬億。同符祖宗。夫惟興王。必藉佐命。咸有一德。克享天心。書曰。非天私我。有商惟天佑于一德。非商求于下民。惟民歸于一德。功臣同德。可不念哉。物有小而感深。事有微而傳遠。臣謹將金像隨表奉進。謹言。

進渾儀表

臣說言。臣聞迎日授時。莫先於歷象。先天成務。必歸於制作。伏惟開元神武皇帝陛下。建中立極。緯武經文。至德難名。神功莫測。於是定歷成歲。立象考天。紹唐堯欽若之文。繼虞舜在璿之義。上皇能事於斯備矣。臣書院先奉勅造游儀。以測七曜盈縮。去年六月造畢進奏。又奉恩旨。更立渾儀。臣等准勅。令左衛率府長史梁令瓚。檢校創造。於是博考傳記。舊有張衡陸績王蕃錢樂之等。並造斯器。雖渾體有象。而不能運行。事非經久。旋即毀廢。臣今按據典故。鑄銅爲儀。圓以象天。使得俯察。上具列宿。赤道周天。度數注水。激輪。令其自運。一日一夜。天轉一周。又別立二周輪。絡于天外。綴以日月。令得運行。每天轉一匝。日行一

度月行十二度十九分度之七。凡二十九轉有餘而日月會。三百六十五轉而行。匝仍置水櫃以爲地平。令儀半在地上。半在地下。晦朔弦望不差毫髮。又立二木人於地平之上。前置鐘鼓以候辰刻。每一刻則自然擊鼓。每一辰則自然撞鐘。皆於櫃中。各施輪軸。鉤鍵交錯。關鎖相持。轉運雖同而遲速各異。周而復始。循環不息。陰陽不能逃其數。度分不能隱其時。究天地之回斡。極乾坤之變化。斯皆上稟聖謨。旁獲神助。臣等愚思非所能及。望錄付史館。宣示百寮。使知告成之功。迴越前古。無任勤懇之至。謹隨表奉進。以聞。臣說誠惶誠懼。

幽州論戎事表

臣說言。伏以先帝以臣踐履忠孝。使臣啓發聖明。故得侍讀春闈。夙承天眷。泊於中歲。兼掌樞密。內當沸騰之口。外禦傾奪之勢。陛下監撫旣安。自天所佑。然臣叶贊之意。神明啓之。開元之始。首典鈞軸。智小任大。福過災生。出守三州。遠離六載。曲直非已。升降由人。惟君知臣。事不待說。今旣牧邊鎮。委重戎麾。竊以兩蕃共和。能識同異。九姓遠聞。撫納欲恃。賊殺無侵。擾之慮保。兩蕃受徵。發之期臣。愚料之恐未然矣。何者。賊殺新立。必逞兵所。加必收九期。若去兩蕃搖失。九姓雖屬。并州節度。然其幽州密邇。脫有風塵。何所不至。臣熟聞幽州兵馬寡弱。卒欲排比。未可卽用。城中倉糧全無。貯積事未逼迫。臣寔憂之。伏乞聖慈。深以垂意。博詢舊將。豫爲籌畫。事若早圖。必無後悔。且孤臣總衆。易起猜嫌。寬大濟事之宜。嚴整招怨。黷之謗。遠辭天聽。臨事回惶。如有論告臣身。奏劾軍事者。乞追臣面問。對定實虛。則日月無可蔽之期。幽遠

有自通之望。伏乞留書在內。時加矜察。

張燕公集卷十

表

并州論邊事表

臣說言。臣說頓首死罪。死罪言。臣聞小忿不忍。延起大患。小罪不寬。迫成大禍。契丹奚背恩。誠負天地不容之責。然原其狀。本是兩蕃君臣不和。自相誅戮耳。伏望聖慈。且使其族類在朝者。將勅書再三告讓。因其所欲立酋長而更定之。或可不戰而定也。必告之不訓。則大發兵馬。東召靺鞨。西舉九姓。來春未青。數道齊入。單于之首。可拾而取。未爲晚也。天恩若不忍以中國勞事蠻夷。則嚴兵備塞。棄兩蕃如糞土耳。又許欽淡擁二萬餘兵。據五丈之城。有糧卽守。不可拔。無糧卽鼓而行。何所慮也。今遣史獻非時。遠抄近掠。其實甚難。萬一未捷。賊氣轉壯。下臣愚昧。不敢隱情。伏望聖恩。再加裁度。臣說誠惶誠恐。頓首頓首。

百官請不從靈駕表

臣某等言。伏以靈駕首途。聖思攀從。國計非便。羣情不安。冒昧上祈。未蒙哀允。跪拜還旨。載深惶惕。臣某等誠惶誠恐。頓首頓首。死罪。臣聞古者天子。上法天心。下極私情。不違衆欲。以順人理。國爲孝。以克己制心爲禮。是故凡聖異禮。公私殊制。私心獨展。凡人之孝。萬姓感善。聖人之孝也。陛下行堯舜之事。以萬姓爲心。奈何守曾閔之節。懷獨展之願。臣等囂囂。竊所未曉。且永淳以後。關輔流散。近適旋定。人猶未足。今

山陵起築。役徒摠萃。彌春涉夏。爲費宏多。若陛下此行。羣司畢從。於人取給。臣實難之。水旱小愆。農慮非淺。東都則水漕淮海。易資監穀之蕃。陸走幽并。近壓戎夷之便。朝命新復。人望在安。宜應靜鎮。未可移動。陛下若俯順羣願。留撫都人。則其安若此。如不勝私情。攀奉靈駕。則其慮如彼。況扈從兵馬。旣不預集。行宮廩蓄。又未先備。發期甫爾。支計闕然。倉卒敦迫。必不堪辦。若待陵寢旣安。霜露終感。三農歲稔。萬乘時巡。奉園廟以展虔。瞻日月以何遠。今固將抒私戀。棄羣言。忘人力。費國用。此實非陛下安集新業之圖。亦恐非先后憐憫遣人之意。且朝廷故事。典章猶在。獻陵追遠。太宗不至于三原。昭陵上遷。高宗不至于九鑿。豈先帝私懷。不堪故事。羣臣公議之所奪也。伏願仰遵舊訓。顧定新基。屈至性而順羣情。抑小節而成大孝。使軍國長算。咸洛皆安。邦甸窮人。賦斂少減。萬姓翹望。實深至願。百寮結誠。期於死請。無任悲迫之至。謹詣朝堂。奉表固請。以聞。

爲留守奏慶山醴泉表

臣某言。臣聞至德洞微。天鑿不遠。休徵祕景。時和則見。是知縣代曠歷。慶牒祥經。帝王有必感之符。神靈無虛應之瑞。伏惟天冊金輪。聖神皇帝陛下。金鏡御天。璿衡考政。欽若元象。宏濟蒼氓。茂功將大造混成。純化與陽和俱扇。朝百神之樂職。宅萬國之懽心。嘉氣內充。淫雨外息。豈止搖風紀月之草。列蒔於階除。儀簫銜籛之禽。相鳴於戶閣而已。固有發禎厚載。抽睨泉源。表元德之潛通。顯黃祇之昭報。臣於六月二十五日。得所部萬年縣令鄭國忠狀云。六月十四日。縣界霸陵鄉。有慶山見。醴泉出。臣謹差戶曹參軍孫

履直對山中百姓檢問得狀。其山平地湧拔。周迴數里。列置三峯。齊高百仞。山見之日。天晴無雲。異風雲之遷徙。非崖岸之騫震。歛爾隆崇。巍然翁鬱。阡陌如舊。草樹不移。驗益地之祥圖。知太乙之靈化。山南又有醴泉三道。引注三池。分流接潤。連山對浦。各深丈餘。廣數百步。味色甘潔。特異常泉。比仙漿于軒后。均愈疾于漢代。臣謹按孫氏瑞應圖曰。慶山者德茂則生。臣又按白虎通曰。醴泉者義泉也。可以養老。嘗出於京師。禮斗威儀曰。人君乘土而王。其政太平。則醴泉湧。潛潭巴曰。君臣和德。道度協中。則醴泉出。臣以五行推之。六月土王。神在未。母之象也。土爲宮。君之義也。水爲智。士爲仁。水伏于土。臣之道也。水相于金子之佐也。今土以月王。而高水從土制而靜。天意若曰。母王君尊。良臣善相。仁化致理。德茂時平之應也。臣又以山爲國鎮。水實利人。縣有萬年之名。山得三仙之類。此蓋金輿景福。寶祚昌圖。邦固不移之基。君永無疆之壽。自永昌之後。迄于茲辰。地寶屢昇。神山再聳。未若連巖結慶。並泌疏甘。羣瑞同區。二美齊舉。高視古今。曾無擬議。信可以紀元立號。薦廟登郊。彰賁德齡。愉衍萬宇。臣辱司京尹。忝寄留臺。牧西夏之疲人。荷東蕃之餘寵。游泳鴻沛。神禧嘉祉。物感有歸。光啓茲部。喜覩殊觀。實百恒流。踴躍一隅。馳誠雙闕。伏請宣付史館。頒示朝廷。無任鳧藻之至。謹遣某官進圖奉進。

爲留守奏瑞禾杏表

臣聞天微地杳。惟聖能通。物寶靈禧。在德斯感。伏惟天册金輪。聖神皇帝陛下。覆翼萬方。植生羣類。化行至道。風流太和。白耀青光。日日月之瑞。赤文元甲。手河洛之符。旣慶溢于山泉。又嘉賁於草木。臣今月三

日得所部萬年縣令鄭國忠狀言。縣界內霸陵鄉。新出慶山。南出醴泉。北岸有瑞杏三樹。再葉重花。嘉禾三本。同莖合穗。臣謹差司兵參軍鄭味元。檢覆皆實。臣謹按孫柔之瑞應圖曰。嘉禾者。五穀之長也。王者德茂則生。昔炎帝教治人心。而嘉禾秀。周公理合天道。而嘉禾豐。臣又以事可理推。物有類驗。蜀桑異葉。李定知其有祥。漢木奇枝。終軍以爲無外。今植物搖落。而瑞杏繁滋。所謂仁育之風。行於肅殺之序。此蓋聖道隆渥。靈祚和多。朱萼素花。彰孝理於詩傳。一莖九穎。合德耀于祥經。曠代殊珍。崇朝累集。方俟山流石髓。杏茂仙林。醴挹軒漿。禾登堯膳。受天介福。錫帝長齡。觀王母於崑臺。朝神人於谷口。今綠苗尚稅。黃粒未成。當須晚秋。不獲早獻。臣忝尹茲部。頻矚洪休。抃躍之誠。倍萬常品。

爲留守作賀嶠山表

臣聞山川變見。如來有得道之祥。國土遠移。至人任不思之力。伏惟皇帝陛下。宏惠福深。勤人願滿。蓮花授記。應上聖之降生。貝葉開圖。握大雄之寶命。司戶參軍孫履直。伏承臣奏。所部萬年縣新出慶山醴泉。乃有天竺真僧。於春首獻狀。若以梵音所記。此是祇闍山。恒河沙佛。必經林下。虛空衆聖。堂處巖間。隱見外方。湧秀中土。岑泉可識。體類宛然。感應十號之尊。示見千輪之主。此實天威無礙。地寶有歸。化焜耀於裁成。理窈冥於言說。但瞻三山丹壁。奄靈鷲而飛來。三泉淥池。逐神龍而吐沃。峯高八百。協周室之隆基。地得萬年。祈皇靈之資始。儒書分載。望偈希聞。加以堅固開林。吉祥被草。重花瑞杏。藻岫紅源。九穎嘉禾。葱鬱黛壑。原臨白鹿。識鹿苑之仙遊。路邇朱城。悟玉城之鐘聽。方俟迴輿雪嶺。厭香積於羣臣。沈璧天池。

蔭靈枝于下國。吹法螺而朝玉帛。乘瑞象而會天人。溢宇流觀。殊隣浹慶。臣守符京郡。奉神嶽於郊畿。係葉皇柯。仰愨雲于雨露。喜抃之極。倍百恒誠。

爲留守奏羊乳麀表

臣聞靈感無方。每先時以見象。神鑒不昧。必憑物以示人。有德著而休歸。或祥來而事應。伏惟天冊金輪。聖神皇帝陛下。端冕馭天。舞干柔遠。南越瑞貢。久通譯而歸仁。西域奇山。近隨方而應聖。臣今月得所部萬年縣令鄭國忠狀送。新出慶山下。殺牝羊乳麀。麀一頭。狎擾因依。動息隨戀。如從所產。若素同羣。理有可嘉。事無前例。竊以異類相育。外方慕化之徵。野畜自馴。荒服來王之兆。必有遠夷企踵。歡心百獸之庭。獷俗懷音。稽顙三乘之會。臣言可驗。翹足是期。昔馬或生羊。易占得人安之體。犬時養彘。天鏡顯代康之文。援此比蹤。實爲同貫。況復晨飲醴浦。夕下靈山。翳仙杏之奇花。拾嘉禾之餘穗。羊禎甚玉。麀慶如銀。晦朔未移。祥符累集。福應之盛。前古未聞。臣忝尹京都。屢薦嘉瑞。抃躍之至。兼倍恆流。謹差某官奉表隨進。

爲留守奏嘉禾表

某臣言。臣聞天聽自人。神和在德。代非乏瑞。罕遇交泰之期。福不虛徵。必自休明之主。伏惟天冊金輪。聖神皇帝陛下。仁覆萬靈。孝理四海。功罔高於尊祖。道莫大于配天。嚴備郊禋。崇肅宗祀。秩百王之禮。兼六代之樂。化溢膠庠。訓優更老。政每光于帝籍。役不奪于農時。嘉氣橫浮。祥風紛洒。騰文煒色。九光連合于貞明。逸輦殊輪。百寶駢滋於動植。臣今月日奉進止。告望鳳臺山泉之瑞。其日于東山栢城內。得嘉禾一

本臣初見衆苗互隴。香穎垂秋。嘉翫繁滋。欲觀稔粒。左右無識。折以呈臣。異其綠葉。緩舒蔥芒。璧秀熟視。奇狀乃知嘉祥。下則異畝合莖。上又同延雙穗。昔雍熙之代理政之君。雖彙出應特。而生不擇地。未有託根神域。彰孝德之能深。吐秀壽宮。助粢盛之豐潔。此蓋睿誠通感。天佑降祥。中古以來。未覩斯美。臣籍慶宗枝。久沐星潢之潤。躬持瑞穎。預奉天保之符。忭悅之誠。倍兼恆品。

爲清邊道大總管建安王秦失利表

臣攸直言。今日某往峽石山。稱前軍王孝傑等。以某日失利於峽石山。忽聞殞絕。心摧魄死。上孤天威。下慙士卒。死罪死罪。頓首頓首。臣以驚怯。謬職戎麾。銜戴恩榮。統率將士。驅關隴之馬。引淮海之餉。旗幕互於邊城。弓甲傾於內府。不堪任使。撓失節度。羣帥無決勝之功。偏師有挫衄之咎。憤結靈祇。怨毒骨髓。臣實其罪。罪非他人。忍恥苟全。遠愧胡顏之責。引慝遄死。內負猶鬪之心。蹶踏無顏。進退靡處。臣既不建師律。有干常憲。合卽嚴科。以塞重責。然以見在兵馬。交要部統。未敢束手。軍事委置。旌節稽緩。刑書伏深。兢戰特乞。更召嚴猛。代臣統帥。請歸罪司寇。以正國刑。囚伏邊陲。唯待斧鉞。

爲建安王謝賜衣及藥表

臣某言。伏奉月日。恩賜臣衣及藥。渥流璿極。彩溢旌門。拜捧戴舞。載欣載越。臣受律虧方。扞城無寄。偏師不振。逋寇仍滋。進慙計日之功。退任踰時之咎。誠合歸罪。司寇以厭深責。豈圖天寵。猥臨宸慈。寬假當從。褻服轉承。且吉之衣。宜肆典刑。翻加有喜之藥。毀車夷馬。復振鸞和。窮炭枯莖。重敷榮燭。跼影邊塞。馳心

闕城微命易投。生成難謝。無任感戴。

爲建安王讓羽林衛大將軍兼檢校司賓卿表

臣某言。伏承月日制書。除臣右羽林衛大將軍兼檢校司賓卿。朝榮封及。恩露洪垂。罄仰驚抃。環揆慙失。臣某頓首頓首。臣席慶皇枝。辱司天衛。素官成責。久盈人口。頃屬山戎自擅。王師震加。謬當推轂之禮。竟空汗馬之績。實賴睿謨幽贊。靈兵潛討。靖烽塵於遼海。卷旌麾於燕薊。臣得歸功北闕。待罪東藩。沐浴休。賜生死榮幸。安敢賣要塞而告勞。貪天功以爲己。又況羽林清禁。上則星辰。主客命卿。下法河海。蓋文武具美。方議望僉歸。豈臣弊劣。所堪尸忝。伏乞特迴睠鑒。更擇能賢。俾朝興薪樞之歌。臣免伐檀之刺。非敢飾讓。實披誠請。無任悚戴之至。謹詣朝堂奉表陳讓以聞。

爲薛稷讓官表

臣稷言。伏奉制書。除臣工部尚書。寵靈俯逮。營魄震飛。揣分何階。戴恩無力。臣某中謝。臣才乏濟川。功微橫草。故以業承薪構。澤潤葭莩。効雕蟲之薄技。蒙金蠅之榮飾。徒參進對。愧無好詞。頃以充職東垣。暫諧清曠。今若統司南省。將招素餐。五翟之正典事。斯重六官之長求人。未易以臣叨受。實謂非宜。願寢前恩。致命他士。無任悚懼之至。謹詣朝堂奉表陳讓以聞。臣所讓人。別狀封進。

爲郭振讓官表

臣某言。臣本書生。幸事先帝。歷踐清職。遂參機密。宗武樹黨。忿嫉正人。猜忌眉睫。構結瘡痍。臣與一二貞

士指天誓心。枝梧羣邪。捍城王室。曉入宮省。暮不望歸。艱危備嘗。幾不免禍。日覬一日。以逢開泰。臣之宿圖。今已足矣。陛下寶位既復。元良又定。凶讎咸剪。百度惟新。正宜博採屠釣。大變風俗。豈臣微才。空忝重任。外不厭於衆望。內實猥於多言。但父年老。先嬰風疾。五月已來。不離枕席。臣方寸已亂。短效無施。夙夜在公。扶侍有闕。乞免官秩。歸侍私庭。罄心仰恩。期於孝治。無任懇迫之至。

謝修史表

臣某言。伏奉今月十六日。勅令臣在家修史。捧恩戴命。且喜且慚。臣服道儒門。策名昌運。掌綸四后。載筆三朝。階緣宿遇。登躡端揆。職爲劇於心盡。史無用而功廢。自貽官謗。待罪私門。反魯之感。徒深藏周之望。已絕。豈意特流天旨。重緝簡書。雖才慚左邱。而時盛周漢。況復編堯舜之年。事皆目覩。敍羲黃之德。言匪傳聞。善志將訓于百王。實錄可貽於千古。國家之鴻業辦矣。朽臣之至願畢矣。不勝天恩難任之至。謹奉表。附內侍尹鳳祥陳謝以聞。

謝賜碑額表

臣說言。伏奉今日恩旨。賜先臣碑額。悲荷交心。拜捧以泣。臣某_中謝。臣亡父先臣隲。安貞下位。不待昌辰。先帝贈之以耑城。陛下目之以積善。光賁重渥。感慶三泉。舉宗悲喜。外姻歡賀。昔孔篆吳札之墳。秦存展季之壟。事輕列國。義小陪臣。豈若天王禮士。鳳書旌墓。榮軼曩賢。道映來籍。在臣在子。移孝爲忠。心効草木。何酬雨露。無任幽明感戴之至。謹奉表陳謝以聞。

謝京城東亭子宴送表

臣某言。力士至。奉宣勅。以臣臨岐。特令賜宴。恭承惠渥。念及庸微。天地同仁。木石知感。不勝惶悚。戴荷之極。臣某^中謝。臣歷觀自古君臣。凡所際會。或因緣黨進。或延接功成。故未竭而知。不言而信。豈有地孤援寡。毀衆謗深。察蒙蔽之中。致曠蕩之外。逢陛下特達之遇。當陛下聖明之朝。事出非常。澤深恩重。今者誓將瀝血。未足竭誠。徒欲殺身。豈能報德。至如勵精勤政。與直守公。酌陛下愛人之心。行陛下宏道之化。安敢失墜。以負神明。但函關路遙。長安日遠。不任戀主悽愴之至。

謝賜鍾馗及歷日表

臣某言。中使至。奉宣聖旨。賜畫鍾馗一。及新歷日一軸者。猥降王人。俯臨私室。榮鍾睿澤。寵被恩輝。臣某^中謝。臣伏以星紀迴天。陽和應律。萬國仰惟新之慶。九霄垂湛露之恩。爰及下臣。亦承殊賜。屏祛羣厲。績神像以無邪。允授人時。頒歷日而敬授。臣性惟愚懦。才與職乖。特蒙聖慈。委以信任。既負叨榮之責。亦懷非據之憂。積愧心顏。難勝惕厲。豈謂光迴蓬華。念等勳賢。慶賜之榮。賤微常及。感深犬馬。戴重邱山。無任感荷之至。

荊州謝上表

臣某言。伏奉二月二十五日制書。除臣荊州大都督府長史。拜命荒服。浮舟遄涉。以今月十七日。到州上訖。山列楚望。水橫南紀。德非羊祜。迹謝宋均。何以鎮靜流亡。攘除猛暴。臣某^中謝。臣宿濫宸睞。累塵榮獎。福

過生災。至剛多缺。及一辭庭闕。已涉五年。不有自白之書。竟無因人之請。天光獨照。雲霧頓披。窮鱗更躍。鐵翮仍翥。揣分瞻恩。何階及此。媿乏才能。不足宣暢皇風。敢竭心力。少冀上酌元造。無任欣忭兢惕之至。謹附送丁匠資。使所部文林郎守公安縣主簿封希魯奉表陳謝以聞。

謝問表元宗

臣說言。內給事高力士至。伏奉墨制。聖慈綢繆。言及舊昔。拜舞捧讀。且驚且喜。臣聞漢主眷騭乘之臣。魏君憶同遊之客。誠以故舊不棄。而光陰易往。今之聖情。實過於昔。臣曩蒙侍文北閣。陪宴東堂。庭闕一遙。寒暄二載。不意逢春之草。承清露之惠渥。容光之隙。引遲日之暉華。無任荷恩戀主之至。謹附高力士奉表陳謝以聞。

謝賜藥表

臣某言。去年某月日。於右銀臺門。蒙天恩引對。特承慰問。攝理無方。以致熱疾。緣在假內。不敢奏聞。聖慈憂軫。詔使臨門。伏枕在床。雖體氣未適。趨風拜命。覺腠理遂平。恩榮豈止於邱山。朽質永延於龜鶴。無任感戴之至。謹奉表陳謝以聞。

岳州刺史謝上表

臣說言。伏奉四月十有二日制書。除臣岳州刺史。某月二十七日。遞書到相州。承恩惶怖。狼狽上道。以月一日。至岳州上訖。臣以昔侍金華。過蒙榮寵。負乘招寇。日待譴黜。聖慈遲迴。仍委符守。刻肌刻骨。誠願上

報恩私無術無才。將何克宣風化。夙夜慚惕。胡寧啓處。伏以貶官到任。理在速聞。不敢循常。稽緩附使。無任荷恩兢懼之至。謹遞表陳謝以聞。

爲僧普潤辭公封表

僧普潤言。伏奉甲寅制書。以普潤加榮沐秩。授邑封公。聖恩無涯。將變枯朽。佛法有教。誠願住持。普潤自剃落壞衣。五十餘載。心不見是。口不言俗。因誠證業。憑禪悟理。幸逢皇祚特啓。大運有歸。皇太子逼畏凶讎。永懷興復。憂虞之際。始蒙顧問。貧道起廣救之悲。決必成之策。奉符命之旨。贊無畏之心。今得衆生又安。羣魔消伏。任於法侶。所願爲多。視身本無。何功受祿。天位有德。陛下享之。天討有罪。太子行之。豈貪天之功。以爲己力。賣佛之法。而求身利。必若冒榮背律。返俗違真。亦恐乖陛下崇信之誠。失如來付屬之義。凡所稱述。諸佛證明。伏惟聖慈。亦垂開領。乞停恩授。以幸法門。無任護戒傳道之至願。謹詣朝堂奉疏陳情以聞。

張燕公集卷十一

疏

諫避暑三陽宮疏

陛下屯萬乘。幸離宮。暑退涼歸。未降還旨。愚臣固陋。恐非良策。請爲陛下陳其不可。三陽宮去洛城一百六十里。有伊水之隔。嶧坂之峻。過夏涉秋。水潦方積。道壞山險。不通轉運。河廣無梁。咫尺千里。扈從兵馬。日費支給。連雨彌旬。卽難周濟。陛下太倉武庫。並在都邑。紅粟利器。蘊若山邱。奈何去宗廟之上。都安山谷之僻處。是猶倒持劍戟。示人鐙柄。臣竊爲陛下不取。夫禍變之生。在人所忽。故曰安樂必誠。無行所悔。此不可止之理一也。宮城褊小。萬方輻湊。填城溢郭。併鋪無所。排斥居人。蓬宿草次。風雨暴至。不知庇托。孤悖老病。流轉衢巷。陛下作人父母。將若之何。此不可止之理二也。池亭奇巧。誘掖上心。削巒起觀。竭流漲海。俯貫地脉。仰出雲路。易山川之氣。奪農桑之土。延木石。連斧斤。山谷連聲。春夏不輟。勸陛下作此者。豈正人耶。詩云。人亦勞止。汙可小康。此不可止之理三也。御苑東西二十里。所出入往來。雜人甚多。外無墻垣禁籟。內有榛叢谿谷。猛獸所伏。暴慝是憑。陛下往往輕行。警蹕不肅。歷蒙密。乘峻巖。卒然有逸獸狂夫。驚犯左右。豈不殆哉。雖萬全無疑。然人主之動。不宜易也。易曰。思患豫防。願陛下爲萬姓持重。此不可止之理四也。今國家北有外寇。覲邊。南有夷獠。騷徼。關西小旱。耕稼是憂。安東近平。輸漕方始。臣願陛下

及時旋軫。深居上京。息人以展農。修德以來遠。罷不急之役。省無用之費。澄心澹懷。惟億萬年。蒼蒼羣生。莫不幸甚。臣自度芻蕘。十不一從。何者。沮盤遊之娛。間林泚之玩。規遠圖而替近適。要後利而棄前歡。未沃明主之心。已戾貴臣之意。然臣血誠密奏。而不愛死者。不願負陛下言責之職耳。輕觸天威。伏地待罪。

諫潑寒戲疏

臣聞韓宣適魯。見周禮而嘆。孔子會齊。數倡優之罪。列國如此。況天朝乎。今外蕃請和。選使朝謁。所望接以禮樂。示以兵威。雖曰戎夷。不可輕易焉。知無駒支之辯。由余之賢哉。且潑寒胡。未聞典故。裸體跣足。盛德何觀。擇水投泥。失容斯甚。法殊魯禮。褻比齊優。恐非干羽柔遠之義。樽俎折衝之禮。

狀

論神兵軍大總管功狀

右牒奉勅責聞大總管功狀者。自契丹背恩。營州失守。前軍喪律。榆關不開。幽平鳥栖於重壘。戎羯虎食於四野。燕南諸城。十僅存一。河朔之地。人挾兩端。由是豺狼入於牢穿。蜂蠶出於懷袖。受服不宿。孤劍先驅。寇讐日深。甲兵未繼。于時鳩合步騎。不滿三千。彼衆我寡。兵法虜熾。且保關守塞。力猶不禦。況土人弄兵。轉相攻拔。外召夷狄。內據險隘。冀州旣陷。勢將不已。當決水之衝。承烈火之焰。逆風撲燎。摧岸寒河。韓白見之。知其難矣。王權以料敵靜而鎮下。宣國恩以撫寧曉愚俗。以逆順督將吏。以忠義示士伍。以嚴肅深籌秘于六奇。潛檄通于千里。滄瀛貝博。響援增氣。幽易恆定。聲威有立。而又分兵井陘。杜其西望。引軍

河漕阻此上流。張虛旗于趙城。設奇兵于襄國。亦猶夫吳人潛軍于巢縣。而見舟豫章。漢將捷逕于武關。而聲出崤澠。蓋廣援以安衆。多方以悞敵。故能舉無遺策。兵不踰時。滌昂宿于妖氛。拔冀方于塗炭。俾皇靈溥暢。黔首昭蘇。朝廷釋東顧之憂。漳淦息南侵之患。然後歸剽掠。返流亡。業窮乏。賑痍傷。僵暴皆掩。死喪無怨。賞不失勞。亦無濫受。罰不漏罪。亦無冤人。則王有大勳于是役也。而又誠以奉上。義以利人。至忠之狀有三。爲善之跡有五。所謂忠者。一曰。思致命也。初戎寇方殷。王乘駟救衆。纔數騎。捍敵羣醜。山東父老。如恃山河。旣而王躬擐甲胄。吐誠師旅。誓在盡敵。以報前讎。故得感激來戰。決命爭勝。二曰。能果斷也。凶黨狂狡。飛轉妖書。吠堯謗舜。間誘愚惑。事斯蔓結。搖我人心。王陰察州閭。揜求魁蠹。獲應賊書人耿羅。謹等一十三人。焚書伏罪。衆而後定。故得破謀殺諜。悖計無施。三曰。誠感神也。王地維近屬。躬當大任。所過山川鬼神之地。罔不精意懇禱。以請云。天子聖明。皇天輔德。實降靈助。以濟神兵。幽感明祇。多獲乎祐。故得行師之處。勝風送旗。合戰之時。興雲翊陣。金鼓所向。冰消草靡。所謂善者。一曰。均下也。飲食勞逸。與將士必同。二曰。潔己也。徧賞有功。王秋毫無受。三曰。詢善也。國之彞典。成誦在心。閱實定名。必資羣議。四曰。嫉惡也。每戮一人。親數其罪。必深加咎責。使愧恥於地。五曰。不伐也。賊平之日。將吏賀功。王稱美天威。推勞士衆。兢兢然若不已有也。惟聖人神武制命。預授兵符。惟大總管忠善龔行。克成廟算。今者顯號年紀。騰輝國籍。方謂垂範雲臺。勒休彞器。而杖杜遺宴。甫率于舊章。茅土增封。殊末于宗正。此壯夫義士。所以竊議而長歎者也。雖樹下不言。用歸功于明主。然策勳有典。何勸善于戎臣。敢憑下問。是用大陳。其所

正復州縣招撫歸降。補署官僚。存集流迸。擒殺凶醜。收獲軍實。與吏士共功者。俱如別狀。

賀彩雲見狀

右伏奉恩旨。今日屬下元。賜臣等侍從。升降聖闕。禮謁大聖尊容。行香之際。日西南有彩雲見者。伏以大
道無形。至誠斯應。上元降福。感而遂通。步輦陟於齋宮。虔修香火。彩雲生于曉日。遽發祥光。是知聖德與
天心合符。萬靈與羣仙叶贊。臣叨陪侍從。如昇汗漫之遊。承恩禮謁。更覩氤氳之瑞。榮幸之極。千載一時。
無任欣慶之至。

賀破吐蕃狀

右臣等伏以涼州遙稟神算。大振天威。吐蕃小醜。應時摧敗。元惡渠魁。乘勢俘戮。隻輪匹馬。坐見無遺。雖
虞舜之格有苗。黃軒之征涿鹿。未有廓清氛祲。如今日之盛者。臣等無任慶快之至。

謝賜撰鄭國夫人碑羅絹狀

右內侍尹鳳祥。宣口勅。得所進鬪羊表。及鄭國夫人碑。今賜卿綵羅二十四絹。一千匹。鬪羊薄技。恩感戰
士之心。雕蟲陋詞。媿稱賢母之德。効輕賞重。戴厚慚深。臣子之情。豈望天報。

集賢院謝示道經狀

右臣伏見聖札。金字八分。寫道經兩卷。以爲惠文太子三七追福。天毫發彩。宸翰騰輝。色麗風雲。光逾日
月。伏惟陛下。孝弟之至。通于神明。俯念天倫。用資幽贊。當茲炎暑。服此勤勞。事絕古今。感深名教。臣忝司

舊職載考前王。未有親親之至。楷隸之美。如此之備也。足以作則貽範。垂之無窮。伏望宣付史館。以光典策。無任誠懇慚惶之至。

謝賜御書大通禪師碑額狀

右內侍尹鳳祥。宣示御書大通禪師碑額六字。畫起平雲。點躡芒玉。戈矛攢倚。鸞鶴交飛。神功發于至想。睿思成于元德。實謂天龍捧持。虛空稱贊。逝者如在。薦福知歸。臣栖志禪門。撰碑靈塔。幸遇聖情崇道。御書假貸。刻星辰于嘉石。爛日月于封邱。感極悲生。恩深無答。臣無任望外殊澤之至。

謝賜藥狀

右內史陳忠盛。宣旨賜臣痢藥。臣攝生無方。自貽疾疢。聖慈矜憫。垂恩救護。氣衰力憊。忽吞永命之符。腸滑胃虛。更餌返魂之草。蒙天營祐。指日痊平。雖萬粉灰。何酬造化。謹附忠盛奉狀陳謝以聞。

對策

詞標文苑科策

第一道

臣聞舜命昌言。漢徵極諫。嘗覽千古。賢哉二君。今陛下發德音。下明制。選空岩穴。訪匣輿臺。大哉邈乎。過之遠矣。臣以草莽之賤。謬當車乘之招。誠不足以庶幾王庭。充塞大問。伏讀聖旨。乃知天心之所存焉。臣聞昔者。鳥跡代繩。龍文演卦。水土遷王。時更萬祀。金木互興。人非一姓。暨乎三皇五帝。氏往夏商。周漢氏

作或導人以禮樂。或驅俗以政刑。或革弊以忠敬。或治風以文武。非師古之誥有殊。蓋隨時之義且異也。伏惟聖母神皇陛下。誕受鴻基。光膺駿命。粵若立極。格天之業。論道布政之典。任賢克暴之功。出洛卿雲之瑞。此并藏緯玉冊。勒休金版。鬱美前古。揚光後葉者矣。至若創業垂統之則。宏猷永圖之美。重光三聖。再清六合。可不謂然乎。猶或惕慮推溝。勞謙馭朽。謝文明于薄德。想疇庸于清問。此陛下之至讓也。愚臣何足以知之。策曰。適時之務何先。經國之圖何最。臣聞古者因人以立法。乘時以設教。以義制事。以禮制心。夫人者。理得則氣和。業安則心固。崇讓則不競。知恥則遠刑。若強人之所不能。雖令不勸。禁人之所必犯。雖罰且違。故曰。政不欲煩。煩則數改。數改無定。人懷苟免之心。網不欲密。密則深文。深文多傷。下有非辜之懼。竊見今之俗吏。或匪正人。以刻爲明。以苛爲察。以剝下爲利。以附上爲誠。綜覈之司。考課專于刀筆。撫字之宰。職務具爲簿書。陛下日昃雖勤。守宰風化多闕。臣以爲將行美政。必先擇人。失政謂之虐人。失人謂之傷政。捨人爲政。雖勤何爲。伏願陛下。進經術之士。退掎克之臣。崇簡易之化。流愷悌之風。畫一成歌。此適時之務也。慎賢而用。此經國之圖也。苟能英才不棄。大化方隆。而猶曰朝謝垂衣。野非擊壤。則文武之道。尙何言哉。堯舜之君。徒虛語耳。策曰。帝皇之道。奚是。王霸之理。奚非者。布在方策。臣聞之矣。聖人御歷。上清而下信。帝者應期。君明而臣哲。周用王道。教化一人。人從。漢雜霸政。刑政嚴而俗僞。故親譽優于畏侮。文章劣于成康。臣謹對。

第二道

臣聞刑以助教。德以閑邪。先王慎于好生。大易誠于緩死。今陛下母臨黔首。子育蒼生。孚佑下人。克配上帝。然有東南小祲。荆蠻遠郊。雖聖德泣辜。尚用防風之戮。天心罪己。仍勞淮甸之征。其有誑誤閭閻。脅從井邑。陛下愍孤霜于海淮。恤困窮于江漢。捨從寬宥。此陛下之恩也。而蕞爾餘孽。蠢茲頑兇。思弄兵于潢池之下。將構難于戎狄之域。罪盈稔貫。禍得萌芽。此又陛下之明也。今陛下乃賜臣策曰。豈止殺之方。乖于折衷。將小慈之澤。爽彼大猷。臣實見折衷大猷之規。不知小乖微爽之義也。策曰。刑政之要。實所明闇。臣聞政猶水火。刑譬陰陽。頃者三監亂常。有司既糾之。以猛于今。四罪咸服。陛下宜濟之以寬。明肆赦之渥恩。安萬人之反側。布深仁于羅鳥。收至察于泉魚。豈不大哉。天下幸甚。且夫人者。毗也。暗而不可罔。庶者衆也。愚而不可欺。是故刑在必澄。不在必慘。政在必信。不在必苛。故明王之理天下也。刑一則人畏。而不干政簡。則俗齊而不僞。於是禍亂不作。災害不生。君安于上。臣悅于下。百姓日用而不知其然。四海風動。惟帝之則。道暢鍾石。聲流舞詠。其行己也。非他所理者。以此刑政之要。庶幾一隅。臣謹對。

第三道

伏惟陛下。則天法地。畏命重人。據河洛之規模。總風雨之交會。軒后魚圖之水。建邦設都。周公龜墨之地。考堂作室。靈祇降福。嘉祥薦祉。制同神造。力以子來。將以殷薦上帝。至法也。嚴配先王。至孝也。加以八風攸序。四時克諧。無得而稱。能事畢矣。猶復執勞謙之不已。懼盛禮之未宏。訪末學之臣。詢稽古之政。斯事體大。臣何足言。然而敢不欽承。以竭涓滴耶。策曰。何代之政。參詳適中。何禮之規。施用爲切。臣謹綜綜三

五明徵典。謨竊以緯武經文。布方策而非遠。英風顯號。流頌聲而可襲。未有反義悖德。而致昇平之政。棄禮違經。克以永終之祿。莫不發號施令。法乾坤之動靜。執契縣衡。順金木之刑政。是故青陽元室。遵孟仲而觀風。白帟朱旂。因離光而布政。養老用上庠之禮。教胄取大學之義。環水著辟雍之名。向陽表明堂之位。蓋所以享羣瑞。朝諸侯。頒正朔。調景緯。成簡易之基。崇久大之業也。皇王奧旨。庶此詳探。周漢前蹤。難于專用。臣才智駑劣。草莽鰕生。至如軍國務廣。政刑理急。但至敬無文。信言不美。陛下欲聽其說。必觀于事。將達其謀。先求諸道。危言抵禁。破膽寒心。伏惟聖主。稍留天聽。臣謹對。

批答

答宰臣賀破賊狀

省表具知。蠢茲戎狄。侵軼邊鄙。不交鋒刃。自取敗亡。旣邊將之功。亦天道所棄。心之有慰。與卿同之。

張燕公集卷十二

序

大衍歷序

特進集賢院學士修國史上柱國燕國公臣說言。歷者先王以明時授人。敬天育物者也。辰極恆居。斗運不息。晦朔相推。而變月。寒暑往來。而成歲。日月右轉。周天之度。啓星辰左旋。正時之氣。合積餘分。而置閏。配甲子而設節。鳳鳥爲司。疇人受職。分分而加之者。百鈞必過。毫毫而減之者。千里必差。何則。古法存而其人異也。不有大聖。孰能起之。伏惟開元神武皇帝陛下。欽崇天道。慎徽月令。受命再新。改制創歷。十有三祀。詔沙門一行。上本軒項。夏殷周魯。五王一侯之遺式。下集太初。至於麟德。二十三家之衆義。比其異同。課其疎密。或前疑而後定。或始會而終乖。振古未探之象。必發揮於神算。大鈞不測之氣。盡覩縷于天聰。迺更審晷度之短長。覈星間之廣狹。繩九道之腠腧。糾五精之進退。參大衍天地之數。綜八卦六爻之序。一轍於文王也。覈春秋交蝕之辰。研九疇五紀之奧。同文於孔子也。杼軸萬象。優柔四載。奏章朝竟。一夕夕落。臣說奉詔金門。成書册府。先有理歷陳景。善算起昇。首尾參元之言。接承轉籌之意。因而會輯。編次勒成。一部名曰開元大衍歷。經七章一卷。長歷三卷。歷議十卷。立成法十二卷。天竺九執歷一卷。古今歷書二十四卷。略例奏章一卷。凡五十二卷。所以貫三才。周萬物。窮數術。先鬼神。稱著曰者。卽聖人顧訪。

之旨。標謹按者。是歷家進對之辭。非軒后至聖。不啓履端之業。非容成詣極。不就歸餘之經。據其圖也。七政之天心不遠。守其術也。千歲之日月可知。蓋中黃之寶符。太紫之神器者也。謹以十六年五月端午。赤光照室之夜。皇雄成紀之辰。當一元之出符。獻萬壽之新歷。伏望藏之書殿。錄於紀言。掌之太史。頒於司歷。制曰可。

唐昭容上官氏文集序

臣聞七聲無主。律呂綜其和。五采無章。黼黻交其麗。是知氣有壹鬱。非巧辭莫之通。形有萬變。非工文莫之寫。先王以是經天地。究人神。闡寂寞。鑑幽昧。文之辭義大矣哉。上官昭容者。故中書侍郎儀之孫也。明淑挺生。才華絕代。敏識聰聽。探微鏡理。開卷海納。宛若前聞。搖筆雲飛。咸同夙構。初沛國夫人之方娠也。夢巨人俾之大秤曰。以是秤量天下。及昭容既生。彌月。夫人弄之曰。秤量天下。豈在乎子。孩遂啞啞。應之曰。是生而能言。蓋爲靈也。越在襁褓。入于掖庭。天實啓之。故毀家而資國。連將興也。故成德而受任。自則天久視之後。中宗景龍之際。十數年間。六合清謐。內峻圖書之府。外闢修文之館。搜英獵俊。野無遺才。右職以精學爲先。大臣以無文爲恥。每豫游宮觀。行幸河山。白雲起而帝歌。翠華飛而臣賦。雅頌之盛。與三代同風。豈惟聖后之好文。亦云奧主之協贊者也。古者有女史記功書過。復有女尙書決事宮閣。昭容兩朝專美。一日萬幾。顧問不遺。應接如響。雖漢稱班媛。晉舉左嬪。文章之道。不殊。輔佐之功。則異。迹祕九天之上。身沒重泉之下。嘉猷令範。代罕得聞。庶姬後學。嗚呼何仰。然而大君據四海之圖。懸百靈之命。喜則

九圍挾纊。怒則千里流血。靜則黔黎乂安。動則蒼毗罷弊。入耳之語。諒其難乎。貴而勢大者疑。賤而禮絕者隔。近而言輕者忽。遠而意忠者忤。惟窈窕柔曼。誘掖善心。忘味九德之衢。傾情大藝之圃。故登崑巡海之意。寢翦胡刈越之威息。璫臺珍服之態消。從禽嗜酒之端廢。獨使溫柔之教。漸於生人。風雅之聲。流於末葉。非夫元黃毓粹。貞明助思。衆妙扶識。羣靈挾志。誕異人之寶。授興王之瑞。其孰能臻斯懿乎。鎮國太平公主。道高帝妹。才重天人。昔嘗共遊東辟。同宴北渚。倏來忽往。物在人亡。憫雕琯之殘言。悲素扇之空篋。上聞天子。求椒掖之故事。有命史臣。敍蘭臺之新集。凡若干卷。列之如左。

孔補闕集序

唐會稽孔季翊。字季和。識真之士也。弱冠制舉。授校書郎。轉國子主簿。年三十一。卒於左補闕。祖紹安。中書舍人。考楨。絳州刺史。季和清規素業。有奕代之訓。依仁游藝。其聖者之後。永昌之始。接跡書坊。有廣漢陳子昂。鉅鹿魏知古。高陽許望。信都杜澄。昌樂谷倚。廣陵馬懷素。東萊王無競。河南元希聲。臨淄李伯魚。譙國桓彥範。僉謂季和神清韻遠。析理探微。衛叔寶之比也。嗚呼。人斯云亡。世閱多故。十年之外。零落將盡。而後來者。皆首華金。步鳴玉。負璽丹地。揮毫紫宸。何嘗於拜職之日。歎在劉王。喬臨壇之時。恨無謝益壽者矣。頃見許渺之子。風裁可觀。潘子之門有尼。夏侯之學傳建。集作者五卷。以示予。稱從弟四人皆良器。愴相如之遺草。幸公業之不亡。因敘曩意。存之篇首云爾。

洛州張司馬集序

夫言者志之所之。文者物之相雜。然則心不可蘊。故發揮以形容。辭不可陋。故錯綜以潤色。萬象鼓舞。入有名之地。五音繁雜。出無聲之境。非窮神體妙。孰能與乎。洛州司馬張公名希元。中山人也。族高辰象。氣壯河山。神作銅鉤。天開金印。孝友內植。禮樂外滋。勵行閭庭。鄉人謂之曾子。飛名都邑。諸儒號曰聖童。下帷覃思。穿牆嗜古。蓬山芸觀之書。羣玉懸金之記。魯宮藏篆。汲冢遺編。無不日覽。萬言暗藏。三篋博學。吞九流之要。處盈若虛。雄辯敵四海之鋒。退藏於密。漢王問策。知帝者之師。楚子聞名。實諸侯之選。故得雄飛白簡。鷹揚丹筆。卷襜帷於天郡。設鉤距於皇都。若乃抗埋輪之章。執驚馬之議。旌賢有通德之教。疾惡存署背之文。繼軌前途。遇物成興。理關刑政。咸歸故事之臺。義涉箴規。盡入名臣之奏。加以許與氣類。交遊豪傑。仕遘夷險。身更否泰。昔嘗攝戎幽易。謫居邛雋。亭臯漫漫。興去國之悲。旗鼓洵洵。助從軍之樂。時復江鶯遷谷。隴雁出雲。夢上京之臺沼。想故山之風月。發言而宮商應。搖筆而綺繡飛。逸勢孤標。奇情新拔。靈仙變化。星漢昭回。感激精微。混詔武於金奏。天然壯麗。粹雲霞於玉樓。當代名流。翕然宗尚。自大夫之頌成室。太史之賦京都。魏則十龍儒雅。晉則三陽藻綴。朝分南北。運迄周隋。文人才子。重世間出。豈止柗榴體物。陳琳得以示人。鴈鷓寄辭。阮籍稱其王佐。故以開國籍。鱗次乎史傳之首。入文場。羽儀乎天下之半。公增繁榮業。桂林之一枝。彌廣源流。荆江之九派。宗門多士。斯爲盛歟。且如承家舊德之基。賓王歷官之序。玉瑄銅渾之數。黃公元女之符。落猿瘖咒之巧。飲鵲迴鸞之妙。詳諸列傳。可略言焉。某室邇蘭芬。族聯棣萼。荷千里之嘉獎。接四友之良遊。謹撰令引。式題前集。七子賦詩。期取類於鄭志。一家垂範。庶齊

衡于孔藁。來日新文。請俟君子。起儀鳳之後。迄景龍以前。凡若干卷。列之於目。

季春下旬詔宴薛王山池序

有生之性。萬殊無方之感。一節陽和而動。植暢春滿而臯壤悅。后皇所以發時令。布新慶。二南邁周召之風。百辟留金石之詠者也。碧流日暖。南山雪殘。首獻歲之浹辰。尾暮春之提日。帝京形勝。借上林而入遊。戚里池臺。就修竹而開宴。泉調玉府。味給天廚。仙倡宥樂。中貴督酒。太平佳事。前史未書。大矣哉。一德日新。九功惟敘。運璇樞而均四氣。握金鏡而靜萬方。堯舜湯文。不違顏於咫尺。夔龍伊呂。共接手於朝廷。不可見而見焉。不可聞而聞焉。豈深思勝殘去殺。累百年之至仁。推歷按圖。啓千齡之昌運。河清難得。人代幾何。擊壤之歡。良有以也。此則青門上路。朱邸平臺。城煙屢起而泊山。野風時來而過水。春將悵別。愛落花之灑途。夏如欣會。玩峯雲之映沼。爾其列筵授几。分曹設幕。艇送江鳧。船迎海鶴。魚龍丸劍。曼延揮霍。鸞鳳簫鼓。朋鳴輩作。中錫開於百壘。慈心出於三爵。炮炙薰林塘。醪醴厭邱壑。拊急管於無算。醉淇恩以取樂。羣公賦詩。俾僕題序。長卿消渴。覺含毫之轉遲。子雲壯夫。見雕蟲之都廢。敢憚鄙詞之訥澀。恐貽盛集之蕪穢云爾。

先天醮宴序

先天元祀。孟冬十月。東都留守韋公寅。奉聖朝述宣嘉旨。乃合洛京之五省。招河伊之二縣。將吏咸集。佩章有序。鏘鏘濟濟。侃侃闡闡。供張於興教之門。式醮宴也。原夫樂生於心。非因清風之奏。和達於氣。無待

陽春之節。蓋澤之所及也深。則情之所感者遠。國家天地一統。君臣百年。朝榮舊德之緒。野服先疇之業。元化漸漬。洪恩既久。太上功德不宰。夏后命子之初。皇帝孝理無爲。漢祖事親之日。生堯舜于天屬。見文武之同時。前古未逢。斯人何幸。是日六樂振作。萬舞苒弱。鳥獸徘徊。士女踴躍。則知衆庶觀聽之所樂也。旨酒絡繹。大庖燔炙。芳溢風煙。醉流阡陌。則知衣冠酣暢之所適也。由近而視遠。萬國之慶皆然。自明而察幽。三靈之歡可接。若夫吟咏德澤。播越仁聲。斯固雅頌之餘風。政教之遺美。凡我詞客。安敢闕如。賦詩展事。垂列於後。

南省就竇尙書山亭尋花柳宴序

尋花柳者。上賜羣臣之宴也。大哉春氣。同夫聖心。無物不榮。有情咸達。況乃五教敷洽。萬邦懷和。尉候警而莫犯。刑法存而不用。歷觀近古。此遇良難。諸公入金門。侍瑤殿。窈窕雲閣。葳蕤華館。不亦泰乎。然王事靡盬。夙夜在公。接良會於愷澤。散煩襟於清曠。不亦優乎。爾其嘉賓爰集。勝賞斯備。召絲竹於伶官。借池亭於貴里。雕俎在席。金羈駐門。遠山片雲。隔層城而助興。繁鶯芳樹。遶高臺而共樂。旨酒未缺。方塘半陰。盍陳既醉之詩。以永太平之日。

鄴公園池餞韋侍郎神都留守序

夫良才出乎休運。大任歸乎令德。四海旣安。乃注意於賢相。兩都分正。實具瞻于師尹。鸞臺侍郎兼左庶子。韋公國之楨幹。人之表儀。矜嚴有叔子之容。持重得楊公之望。門通禁省。當朝稱累代之名。管綜諸闈。

帖職盡一時之美。頃以五星東聚。八月西巡。武王既入於鎬京。君陳當往於洛邑。中日晷之盈縮。均天宇之會同。清廟明堂。政理之本也。太倉武庫。兵食之原也。機務所總。半天下之軍國。聽訟實繁。連海隅之郡縣。恩有密而處遠。事有疎而授親。腹心遐寄。惟賢是屬。歲臨單闕。月在長嬴。同蕭何之居守。當陰識之留鎮。北闕拜辭。西堂宴餞。大君垂藻。承月露之光榮。元良賜服。被星海之耀潤。執事以同列之好。載壺酒而送行。鄴公以彌甥之禮。掃郊園而留別。此地有離洲別嶼。竹館荷亭。曲沼環合而連注。叢山相望而間起。幽隱長寂。蕭條遠風。通終南之雲氣。下昆明之水鳥。爾其駐馬青林。肆筵碧岸。清管四發。坐客增悲。高臺一望。游人忘返。韋公方祇率嘉命。保釐成周。樹之風聲。流我王澤。然而臨觴不樂。首路遲遲。瑣闥夕拜。戀未央之宮闕。錦服晝遊。懷杜林之桑梓。層城日下。高蓋雲飛。天子賦詩。已載寵行之輿。羣公盛集。須傳出宿之文。凡若干首。合成一卷。陸生何幸。暫游朝宰之間。商也斐然。經述國風之序云爾。

送工部尚書弟赴定州詩序

宵旰天子。送冬卿之詩也。河朔愆歲。恆陽俟牧。借威六官。導俗千里。俾乎列城。遷仰上之化。鄰境蒙波及之澤。不然者。豈一小郡而勞大賢哉。尚書河東侯。朝廷之舊宰也。操法度于掌握。運陶鈞于方寸。是將敷皇惠。寒谷挾纊而知暄。暢君恩。疲人飲德而自飽。蘇其稿瘁。樂我陽和。元宗殿國。亦望于此。于時春帶餘寒。野銜殘雪。太官重味。御酒百壺。供帳臨岐。假絲竹以留宴。傾城出餞。會文章以寵行。三台厚常察之意。八座深聯事之矚。既而離人遽起。班馬爭嘶。尋太行之連山。想邯鄲之長陌。雖仰瞻鴻鴈。來往易於前期。

而相對桑榆。遲暮難于遠別。送歸之地。歡悵如何。應制華篇。凡若干首。騫翔鸞鳳。欲挂千金之木。糾合蛟龍。附藏羣玉之府。置之懷袖。以慰遐心云爾。

送毛明府詩序

昔之謂良宰者。講道議行。訓俗式人。出自郎官。遷登郡守。不以才限流品。位遷寵賂。聖歷之際。任賢稽古。毛明府執德不回。發言無擇。雍容文雅。罷曲江之曳裾。樽酒絃歌。卽羊卿之製錦。甲朝辭洛宴。別嘉賓。孟夏涉河路。踐芳草。眷彼燕趙。頃罹戎寇。金革毒三北之師。杼軸醜二東之賦。毛公將勝。苛居簡止。濁徐清。不下堂而爲理。有入境而先歎。朋知坐間。弦望何時。益賦金谷之詩。遠送邯鄲之陌。愛而不見。同夫樹萱。

會諸友詩序

谷子者。昔與說聯務蓬山。出入三載。事志相得。情深友于。尋屬吾人秩遷。迫吏畿劇。愛而不見。春也再華。今說復謝書坊。補他職。窮猿之意。不擇儒林。喜且把袂舊筵。解帶餘日。臥玩文墨。笑談平生。茲歡豈多。後面方永。沉沉春雨。人亦淹留。

張燕公集卷十三

啟

上東宮講學啓

臣某等啓。臣聞安國家定社稷者武功也。經天地緯禮俗者文教也。社稷定矣。固寧輯於人和。禮俗興焉。在刊正於儒範。順考古道。率由舊章。故周文王之爲太子也。崇禮不倦。魏文帝之在青宮也。好古無怠。博覽史籍。激揚令聞。取高前代。垂名不朽。伏惟皇太子殿下。英睿天縱。聖敬日躋。神算密發。雄威立斷。廓清氛祲。用寧家國。兆人由是歸德。六合所以推功。主鬯青宮。固本也。分務紫極。觀政也。副羣生之望。作累聖之儲。殿下之於天下。可謂不輕矣。監國理人。可謂至重矣。莫不拭目而視。清耳而聽。冀聞異政。以裨聖道。臣愚伏願崇太學。簡明師。重道尊儒。以養天下之士。今禮經殘缺。學校陵遲。歷代經史。率多紕繆。實殿下闡揚之日。刊定之秋。伏願博採文士。精求碩學。表正九經。刊考三史。則聖賢遺範。粲然可觀。況殿下至性神聰。留情國體。幸以問安之暇。應務之餘。引進文儒。詳觀文典。商略前載。討論得失。降溫顏。開讜議。則政途理體。日以增益。繼業承祧。永垂德美。臣等行業素輕。藝能寡薄。顧慚端士。叨侍宮闈。日夜祇懼。無以匡輔。區區微誠。願効塵露。輕進芻鄙。庶垂採擇。臨啓如失。伏用兢惶。謹啓。

書

與執政書

說拙於守身。往年遷流嶺外。亡親愁懼。痼疾增加。比蒙生還。曾未數歲。家口在洛。身徒入京。及丁凶苦。不獲侍側。比於他人。情實不等。在禮。君親同貫。事君無負。事親有負。不能殺身。以自咎責。乞過祥禫。報國非遲。三度表請。不蒙矜遂。當是文墨。不盡苦心。投之執事。乞爲一言。聞達。不敢守禮抗請。直是私情。乞恩。若以此情可矜。猶冀聖人。萬一哀憫。若將遺越。甘心待罪。謹狀。

與鄴駙馬書

晚尋莊周書。以天地爲國。道德爲身。老室之戶牖。孔門之棖闥。足可反覆。孝慈胎育。仁義而管朝賢士。乃祖尚浮虛。弛廢禮樂。其所遺失。將詣真宗。不愈遠也。老稱歸根曰靜。復命知常。復命近于無有。知常其有知見耶。斯故反照爾。孔云窮神知化。德之盛者。神不可窮。而窮之。是神合于我。化不可知。而知之。是化爲我用。唯此二義。繫莊生亦未始盡言焉。非滎陽之深于道者。孰爲輕導茲意也。

露布

爲河內郡王武懿宗平冀州賊契丹等露布

大總管右金吾衛大將軍兼檢校洛州長史河內郡王臣某。前軍總管行左衛翊府中郎將上柱國定陽郡開國公臣楊元基。行軍長史朝奉大夫守給事中護軍臣唐奉。一行軍司馬通議大夫行六官郎中鄭果等言。臣聞氛祲薄霄。戎狄謀夏。則武庫兵動。中國有弧矢之威。文昌將飛。邊城用金革之事。蓋以式遏

姦暴大庇黎人。震蠻蕩夷。明罰耀武者也。伏惟天册金輪聖神皇帝陛下。仁覆有截。化被無外。皇圖未臣之黨。帝載不庭之俗。罔不衣被聲教。浸潤邕熙。望雲向風。密邇遐裔。而契丹兇醜。奴隸餘苗。非冒頓之雄族。異單于之貴種。徒以錯居遠郡。漸化平時。田牧混乎四毗。質遷通于三市。戍人解里。邊馬垂轡。禽獸飽而忘恩。蜂蠶養而恣毒。敢孤亭育。自絕生成。乃狼心于紀。鷓張竊發。虐我邊吏。覆我鎮軍。大棘殘于夷落。孤竹淪于荒虛。陛下震赫斯之怒。授決勝之符。天地合謀。鬼神助順。六狄舉國。百蠻整衆。連撓搶而掃除。從列缺而焚蕩。臣飲冰受斧。指日揚麾。雖謝河間之學。竊慕任城之勇。誓將首冒鋒刃。躬先士卒。上假神兵之威。下定鬼方之罪。凶醜狂悖。素無大志。因乘便利。扇動姦回。去歲嘗師。疑一軍之盡化。今春輕敵。見三帥之不歸。蟻聚實繁。豺牙益厲。結山戎以西寇。連島夷而東入。臣乃廣開形勢。大振聲威。移告郡邑。金湯固守。傳檄諸軍。犄角相應。清邊道大總管建安郡王攸宜。杖鉞薊門。作鎮燕國。當要害之地。挫虎狼之羣。高壘深溝。臥舊營而不動。山蛇雲鳥。陣死地而無疑。總管沙叱忠義王伯禮。安道買等。兵臨易水。使接桑河。犀渠衝將士之冠。雕騎落將軍之戰。四面當敵。九拒乘城。御史大夫婁師德。總管高再牟。薛思行。扞敵中山。折衝外侮。訓厲鷹揚之士。輯睦震驚之師。其餘部散校分。離綱別緒。兵車星布。巡大行而綴碣石。介馬雲羅。挾衡漳而連海浦。山川積雨。盡消邊騎之塵。草木長風。咸有王師之氣。清邊士馬。稍南驅而擁蹙。神兵甲卒。漸北逐以威臨。但合圍而持重。未輕挑而卽戰。重以藩臣默啜。統率氈裘。控弦逾于萬騎。帶甲彌于千里。長驅松漠。掩集柳城。巢穴是空。胎卵皆覆。于時賊衆兵馬。屯逼幽州。聞其塞外之敗。懼有舟

中之敵。勢力外窮。心腹內乖。建安郡王攸宜。蓄銳淵停。乘機電發。援桴作氣。則山岳動搖。書箭一飛。則會渠相滅。兵纔接刃。元兇授首。春喉蔽野。京觀起于中州。積甲成山。組練收于外府。雖本根斯拔。已蕩滌于一隅。而餘蔓所滋。尙聯延于數郡。賊帥何阿小等。頑凶是極。奢儉爲資。授其署置。肆行驅掠。幽陵之下。不知首惡之已擒。兩河之間。仍謂游魂之可恃。士女遭其遶脅。軍城被其屠陷。以殺戮爲事。戶積虔劉之悲。以劫奪爲心。家盈剝割之痛。鹿城縣令李懷璧。衣冠貴胄。令長崇班。背我朝恩。歸城狄寇。潛修甲杖。輸以利器之資。見委兵權。當其上將之任。蠢茲狂亂。暫同燎火。言事剪除。方申沃雪。臣乃盛兵邢趙。塞井陘之隘。命虎賁之將。遏其衝突之鋒。長史唐奉一。馳使洛魏。據阿曹之津。縱羽林之雄。挫其侵軼之勢。臣又遣將軍總管忠武將軍。行左衛翊府中郎將。上柱國。定陽郡開國公。楊元基。押飛騎營中郎將。李鐸。子總管雲麾將軍。行玉鈴衛翊府中郎將。康國公。阿史那毗伽。子總管冠軍大將軍。行左玉鈴衛翊府中郎將。宋撥延。子總管冠軍大將軍。行左金吾衛翊府郎將。回鶻果。別勅行人。雲麾將軍。康戡誕。子總管定遠將軍。左威衛長。李常義。壯武將軍。何義本。子總管忠武將軍。何利深。子總管壯武將軍。俱羅羅准。宣威將軍。行左玉鈴衛翊府郎將。蘇達侯。斤度施。子總管定王府典軍。成善威。子總管押飛騎定遠將軍。平原府左果毅長上。穆仙童。子總管劉尙珪。子總管渭川府左果毅。鹿思讓。押飛騎左玉鈴衛隊正長上。賈楚珪。左鷹揚衛長上。花匡鼎。押飛騎。李言忠。押飛騎沮忠。揚鎮副。張元孜。押飛騎。康景休。押飛騎左監門衛司戈。竇九臯。別奏右武威衛長上。楊仁爽。左武威衛長上。楊裔。原州崇岡鎮副。康戊子。右監門衛長上。傅阿毛。左

監門衛長史殷承範。右衛長上王仁獎。右衛執戟嚴宏琰。右金吾衛羅元讓。潭州花石戍上蘇元暉。前右
武威衛長鄭嘉祥。左衛司弋鄭彥湊。媯州威寧戍主崔思陳。押步兵子總管左玉鈐衛長上張中儼。別奏
首領蘇農婆羅三品子首領宋義本。別奏游擊將軍左玉鈐衛宿衛哥咄施注比。別奏鄭思疾。左衛潞州
府果毅員外置同正阿史皎。子總管王城府檢校果毅任宏誓。別奏檢校虞候任處寂。別奏裴光嗣等。徇
其東北。又遣子總管游擊將軍玉鈐左司階伏羌縣開國男李宏顏。子總管邢州司戶參軍飛鳥縣開國
男常元楷。子總管原州廣牧領將軍元寂。子總管右武衛員外置同正武元禮。子總管前潞州參軍武其
別勅行人張景。扶州刺史舊鎮副崔敬一。右武衛中郎將阿史德奉職。右鷹威衛將軍業溫。啜刺侯斤。右
豹韜衛柔遠府長史上果毅吐火羅決斯。右金吾衛果毅執失守直右鷹揚郎將員外置同正阿所那。左
玉鈐衛長上借緋金元濟。東天竺國王子僧伽杖摩。右鷹揚衛郎將僕固郡骨支。左金吾衛郎將阿康地
具右武威衛郎將東河察使左豹韜衛高城府長上果毅阿史德伏摩支。右玉鈐衛郎將路驢駒。左金吾
衛長上阿史德伏摩支。右玉鈐衛郎將路欲谷。游擊將軍葛羅枝延。游擊將軍契苾木昆。折衝都尉車鼻
施俟斤。虔州猶口鎮副白善德。晉州仁壽府果毅侯義威。子總管左武威衛候神城府果毅杜元隱。押後
隊長上張德峻。天官常選王暉。常彥緯。押千騎三交戍董尤景。河州安喬戍主王才龜。別奏康元寂。押千
騎隊楊待封。前冀州堂陽縣丞溫待禮。別勅行人白君誓等。略其西南。或折衝其前。或乘蹻其後。整貔貅
之佐。奮猛毅之倫。長戟林廻。高旗雲撓。賊黨昇窮。漏急命窄。途殫執無全之心。投必死之計。以今月一日。

何阿小等帥不悛之旅。擁脅從之衆。結聚數萬。抗拒官軍。自寅及午。前後九陣。元基等並鋒鏑爭先。戈鋌遞躍。抗足而跣。鮮卑之血塗地。攘臂而扔。烏丸之首積野。摧同冰陷。裂若山焚。窮其子遺。無復噍類。斬獲逆賊。冀州三品大總管何阿小。逆賊河北道招慰大使。冀州刺史馬行慰。逆賊冀州道副大總管楊奉節。逆賊冀州長史王宏允。逆賊總管劉伏念。逆賊十二衛大將軍。見任鹿城縣令李懷璧。逆賊信都縣令楊志寂。總管胡六郎。逆賊總管王知先。逆賊帥馬明誓。逆賊三品總管姬目等。魁首巨蠹三百餘人。所有戎馬。憑陵殘毀之處。臣皆宣布制旨。撫集其人。咸懷聖恩。俱得復業。羣凶既定。冀方砥平。二載述誅。一朝泯滅。數州愁毒。俄然清弭。舞溢河冀。歌達塞垣。截風浪以息滄溟。廓氛埃而覩白日。郤穀何力。敢推羣帥之勞。叔向有言。實在明君之德。臣憑藉睿略。忝當戎政。神機密運。不待橫草之功。天贊冥符。恭承破竹之勢。伏惟廟勝。速奉朝歡。抃舞之情。倍萬恆品。不勝慶快之至。謹遣僉人。夫官常選李佑。別奏左衛長上校尉張德俊。奉露布以聞。其軍資器械。別簿條上。謹言。

張燕公集卷十四

碑銘

后土神祠碑銘

至哉坤元。萬物資生。王者母事。德合天明。義有大報。用協永貞。茫茫九土。思索其精。因天事天。因地事地。彼汾之曲。高睢傑異。景象遺光。壇場舊位。寂寥千祀。精靈永閔。諛神不祥。復古維祺。文所無者。秩而祭之。矧曰后土。昔載明祠。何必因陰。乃爲我師。意多漢武。跡在橫汾。風流可接。簫鼓如聞。壽宮創制。神鼎勸勳。古往今來。豈無斯文。

西嶽太華山碑銘

巉巖太華。柱天直上。青崖白谷。仰見靈掌。雄峯峻削。菡萏森爽。是曰靈爽。衆山之長。白帝西下。黃河北來。陰陽孕育。精氣徘徊。偶聖呈瑞。逢昏降災。玉池神挹。石室仙開。海絕瀛洲。天遙元圃。偉哉此鎮。錚鏘西土。鬼神年遊。風雲忽聚。高標燄日。半壁飛雨。自古王者。巡方必至。龍駕帝服。封天禪地。南面會神。西后在位。待予治國安人。然後徐思其事。

唐陳州龍興寺碑

觀夫廣大無相者。空虛也。四輪倚之。而住對微無體者。佛性也。萬法因之以生。聖人有以見三界成壞。皆

有爲殼。故剖之以戒觜。聖人有以見六趣輪迴。是無明網。故決之以定力。燦寶光之慧炬。而沛善利之慈舟。返迷路於中道。猶橫流登於彼岸。以言乎真實之要。總攝一乘。以言乎天地之間。曲成萬物。大矣哉。道心包舉。等太虛而無際。法教流通。彌曠劫而常在。則有乘如來方便。出應化門。用大士因緣。處帝王位。俾庶類咸若。謂之光宅天下。令衆生修善。名爲莊嚴佛國。龍興寺者。皇帝卽位之歲。溥天之所置也。唐祚中微。周德更盛。歷載十六。姦臣擅命。伯明氏有盜國之心。一闌提有害聖之迹。皇上操北斗。起東朝。排闥闔。運扶搖。張目而叱之。般乎若震雷發地。歛鷗翁響。以克彼二凶。赫然若太陽昇天。晞照仰象。以復我萬邦。返元后傳國之璽。受光武登壇之玉尊。祖繼宗。郊天祀地之禮。旣泊。修舊布新。改物班瑞之典。又備。乃考出世之法。鼓大雄之事。入無功用之品。住不思議之方。一光所燭。庶兆爲之清涼。一音所宣。大千爲之震動。雲蒸風靡。不崇朝而壤之踴塔。徧天下矣。陳州者。上古太皞之墟。近代睢陽之地。置守則列爲郡。封王則建爲國。本其風俗。豪侈靡麗。舊矣。翻東門之下。接袂成帷。觴宛邱之上。炫服成市。信豫章之郊。一都會也。刺史南陽韓府君名琦。其爲邦也。勝殘去殺。聖主之得賢臣。別駕彭城郡王名隆業。其從政也。能肅而恭。高陽之有才子。長史南陽張齊賢。儒林之選也。司馬河南雲益。公族之良也。士曹從事八人。錄事參軍。千璆爲稱首。六屬官人二十五人。宛邱縣令崔修己爲稱首。或以藝榮。或以門進。高車一轍。美利同人。禮舉刑清。於是乎在。因邦甸積稔之蓄。偶日月正旦之初。欽若王言。建立靈寺。上略其趾。下務其終。百工不勸而亟。庶役不徵而會。經始如雲。成之不日。夫其帶四郭五衢之陌。踞重墉闔闔之端。福地砥平。長垣

雲蟲高門有闕。大廈斯飛。連廊曲閣。交軒對露。木磨而不雕。土塗而不飾。壯無僭侈。以約費爲工。儉無偏陋。以淨居爲寶。法王宮殿。近寶花之域。菩薩伽藍。住金燈之地。亦猶是也。上座處元。寺主真度。維船守慎。等戒珠如月。獨潔麒麟之行。法寶如山。普聞師子之吼。克諧善衆。底定神居。甘露飽而滿盈。天香醉而圍繞。于時陳項之老。褒衣而博帶。幡幡然相造而誦曰。久矣吾黨之惑也。倥侗顛蒙。情實橫放。悉愛我業。聰明不開。日有忘其生。生月無覺其滅。滅一息之漏。可勝言哉。而今舉足。至于道場。申臂及于淨土。晝則目禪誦之事。夜則耳鐘梵之音。何悟是生。晚臻斯樂。豈不思天子之至仁乎。惻下人之昏墊。適上聖之昭軌。假有相之途。詣無生之理。灑冥澤於已滅。蒂元根於未始。百靈之所歸依。萬宇之所欣喜。非獨陳而已矣。蓋神闢天。聖開地。世之祖也。纂帝寶。基皇統。孝之主也。殄譎狂。破魔孽。威無外也。廣正典。紹度門。德無大也。通幽洞明。兼羸該精。滂洋而行。混濩厥成。一收功而四善舉。一推心而羣願立。咨如是。則龍興之化。曷有量哉。夫業可大而蕪沒焉。不貽於後。事可尊而苞蘊焉。不述於世。臣子之罪也。敢請圖之。然言語之不到者。心識之不到者。真如。二乘聞之而不見。十地見之而未了。而我云何能知能說。竊比六時之鳥。七寶之樹。是出乎和雅音聲。是讚乎微妙功德。記其在處。長者之金園。銘其事因。育王之石柱。其詞曰。聖皇在上。於昭于天。唐雖舊邦。其命維新。龍輿返政。滅二暴臣。少康非擬。于舜爲鄰。皇王烝哉。於廓元教。生人戶牖。神化洒心。小大稽首。掌擎萬域。潛移仁壽。三代之前。蓋未曾有。最上乘哉。泱泱陳服。韓侯道之。奕奕寶坊。邦人造之。天龍護持。賢聖熙熙。受福維祺。帝心則怡。正理興哉。

唐玉泉寺大通禪師碑

譏夫總四大者。成乎身矣。立萬法者。主乎心矣。身是虛哉。卽身見空。始同妙用。心非實也。觀心若幻。乃等眞如。名數入焉。妙本乖。言說出焉。眞宗隱。故如來有意傳要道。力持至德。萬劫而遙。付法卽一念而頓授。佛身誰其宏之。實大通禪師其人也。禪師尊稱大通。諱神秀。本姓李。陳留尉氏人也。心洞九漏。懸解先覺。身長八尺。秀眉大耳。應王伯之象。合聖賢之度。少爲諸生。遊問江表。老莊元旨。書易大義。三乘經論。四分律義。說通訓詁。音參吳晉。爛乎如夔孔翠。玲然如振金玉。旣而獨鑒潛發。多聞旁施。逮知天命之年。自拔人間之世。企聞蘄州有忍禪師。禪門之法嗣也。自菩提達摩。天竺東來。以法傳惠。可惠可傳。僧璨。僧璨傳道信。道信傳宏忍。繼明重跡。相承五光。乃不遠遐阻。鸞飛謁詣。虛受與沃。心懸會高。悟與眞乘。同徹盡捐。忘識。湛見本心。住寂滅境。行無是處。有師而成。卽燃燈佛所。無依而說。是空王法門。服勤六年。不捨晝夜。大師歎曰。東山之法。盡在秀矣。命之洗足。引之並坐。於是涕辭而去。退藏於密。儀鳳中。始隸玉泉。名在僧錄。寺東七里。地坦山雄。目之曰。此正楞伽孤峯。度門蘭若。蔭松藉草。吾將老焉。雲從龍。風從虎。大道出。賢人覩。岐陽之地。就去成都。華陰之山。學來如市。未云多也。後進得以拂三有。超四禪。昇堂七十。味道三千。不是過也。爾其開法大略。則專念以息想。極力以攝心。其入也。品均凡聖。其到也。行無前後。趣定之前。萬緣盡閉。發慧之後。一切皆如。特奉楞伽。遞爲心要。過此以往。未之或知。久視年中。禪師春秋高矣。詔請而來。趺坐覲君。肩輿上殿。屈萬乘而稽首。洒九重而宴居。傳聖道者。不北面。有盛德者。無臣禮。遂推爲兩京。

法主三帝國師。仰佛日之再中。慶優曇之一現。混處都邑。婉其秘旨。每帝王分座。后妃臨席。鸞鷲四匝。龍象三繞。時熾炭待礦。故對默而心降。時診飢投味。故告約而義領。一雨溥霑於衆緣。萬籟各吹於本分。非夫安住無畏。應變無方者。孰能至爾乎。聖敬日崇。朝恩代積。當陽初會之所。置寺曰度門。尉氏先人之宅。置寺曰報恩。軾閭名卿。表德非擬。局厭誼輦。長懷虛壑。累乞還山。既聽中駐。久矣衰憊。無他患苦。魄散神全。形遺力謝。神龍二年二月二十八日夜中。顧命趺坐。泊如化滅。禪師武德八年乙酉。受具於天宮。至是年丙午。復終於此寺。蓋僧臘八十矣。生於隋末。百有餘歲。未嘗自言。故人莫審其數也。三界火心。四部冰背。樓崩梁壞。雷動雨沆。凡諸寶身。生是金口。故其喪也。如執親焉。詔使弔哀。侯王歸贈。三月二日。册諡大通。展飾終之義禮也。時厥五日。假安闕寒。緩及葬之期。懷也。宸駕臨訣。至午橋。王公悲送至伊水。羽儀陳設。至山龕。仲秋暨望。還詔乃下。帝諾先許。冥途宿心。太常卿鼓吹導引。城門郎護監送喪。是日天子出龍門。法金襴。登高停蹕。目盡迴輿。自伊及江。扶道候哀。幡花百輦。香雲千里。維十月哉生魄。明卽舊居後岡。安神啓塔。國錢嚴飾。賜逾百萬。巨鐘是先帝所鑄。羣經是後王所錫。金榜御題。華幡內造。塔寺尊重。遠稱標絕。初禪師形解東洛。相見南荆。白霧積晦于禪山。素蓮寄生于坐樹。則雙林變色。泗水逆流。至人遠代。同符異感。百日卒哭也。在龍花寺。設大會八千人。度二十七人。二祥練縞也。成就西明道場。數如前會。萬廻菩薩。乞施後宮。寶衣盈箱。珍價敵國。與寵貴侑供巡香。其廣福博因。存沒如此。日月逾邁。榮落相推。於戲法子。永戀宗極。痛慈舟之遽失。恨湧塔之遲開。石城之歎。也不孤。廬山之碑。焉可作。竊比子貢之論夫。

子也。生於天地。不知天地之高厚。飲於江海。不知江海之廣深。強名無迹。以慰其心。銘曰。額珠內隱。匪指莫効。心鏡外塵。匪磨莫照。海藏安靜。風識牽樂。不入度門。孰探法要。倬哉禪伯。獨立天下。功收密詣。解却名假。詣無所得。解亦都捨。月影空如。現於悟者。無量善衆。爲父爲師。露清熱惱。光射昏疑。冀將住世。萬壽無期。奈何過隙。一朝去之。嗟我門人。憂心斷續。進憶瞻仰。退思付囑。盡不離定。空非滅覺。念茲在茲。敢告無學。

元識闍梨廬墓碑

夫孝者。法象乎天地。感通乎鬼神。故愛敬之中。又有真報。哀戚之外。更追冥福。元識禪師。其人也。厥姓桑氏。其先長樂人。漢尙書洪之後。曾祖梁州刺史諱千秋。祖貴鄉令諱信。考文林郎名爽。自前代無違德。基於累仁。是生達者。禪師智周萬物。而理證本無。願度四生。而見滅諸有。以爲空不離色。體念子之慈。業不忘緣。起思親之孝。乃於萬山北陌。滎陽東原。葬先考文林府君。先妣太原王氏。負土成墳。結廬其域。置義井。取施無求報。鑄洪鐘。取聞而悟道。修古寺。造尊容。取觀相生信。若夫信生攝。攝生靜。靜生定。定生慧。於生滅處。得常住心。於虛空中。立一切法。其定慧之門乎。禪師昔宴坐介山。羣虎自擾。今經行宰樹。四衆依德。至人凝寂。雖罕見全象。識者餘論。亦時存一隅。篆美豐石。寄詞短偈云爾。

邈矣上德。行密道高。哀哀父母。生我劬勞。禪心護念。神足遊遨。苦河雖廣。曾不容舳。甘井旣濶。利物無竭。不增不減。不流不滯。仁靜而鑒。智動而悅。華鐘旣鏗。雄雄法聲。如來如去。如滅如生。不有奚得。不爲胡成。

寶地嚴飾。金山晃耀。善惡無門。惟人所召。境因心起。理憑思照。懋哉一心。混成衆妙。

贈陳州刺史義陽王神道碑

昔高祖之起唐侯。革隋命。太宗之威四海。正萬邦。作藩帝家。用建王國。二十一族。堯之昭也。十有一宗。文之穆也。王諱宗。字某。文帝之孫。紀王之子。龍種異氣。鳳毛秀色。仁義天啓。德威日就。學無不探。藝無不究。故齊王之胤。以爵推恩。周公之子。以才分政。總角封義陽郡王。弱冠拜歸州刺史。又守檀州。又撫沂州。若敖之舊。荆人是懲。單于之衝。胡馬自遠。淮沂其乂。邦國不空。遭王運中微。投於南海。書稱大去。憫失土之諸侯。禮不逃誅。義無辜之王子。某年月日。遭六道酷吏。薨於桂林之野。春秋五十。神龍之初。興廢繼絕。追贈陳州刺史。王生不得志。沒受遺榮。信乎才之短長。不如命之豐約。德之輕重。不如藝之厚薄。有美季子。豫州刺史。行休。髻髮羈孤。託身炎厲。貌是餘慶。歸然獨存。泣血上請。迎喪遠裔。開元四年二月。至桂林。王同氣三人。往偕遇禍。殞殞無主。封樹缺如。歲月茫茫。盡爲野草。閭隣母而失處。訪樵童而莫識。議者以爲不可復得。宜招魂而葬。行休拊心。蒼昊誓不徒還。乃掃亭館。設地席。潔齋懇惻。覬乎幽報。遂憑夜髣像。曲示其端。夢魯王乘舟。舟分爲兩。旣而適野。見東洲中斷。因忽悟焉。陰隱微明。率此類也。又靈堂鑱莖。一夕自屈。管上有三指凹迹。一奇二並。其傍鐵生文理。布列成卦。衆駭其異。使善易者張法善之曰。屈者於文爲尸出。指者於義爲指蹤。一奇二並。三殯近闕。若引渦山揆之。可以察先王之心矣。考夢協吉。定處尅辰。以其月二十八日。於桂城東洲。發見神柩。舉體咸備。而一節闕焉。行休甚痛惋。若自毀裂。其夜又夢王告。

在南洛州。厥明直舊殯而南。十有九步。沙洲痕下。掘而得之。安合如故。他日北郭之外。又併收二叔父焉。於是乎驗著夢之有徵也。子子三旒。連舳歸飛。遙遙百越。經途瞻歎。零桂人士。以爲美談。夫至孝潛通。精魄昭應。果虛無之見。推步而有必窈冥之體。尋求而致。雖前誌所詳。未有幽感反覆。若斯之昭晰矣。以某年月日。陪葬於昭陵栢城。妃汝南周氏。祔焉。禮也。妃考曰駙馬都尉梁郡襄公。妣曰臨川大長公主。宗周元胄。大君自出。左右圖史。循環法度。邦有好速。室無偕老。以王之故。薨於掖宮。初永昌之難。王下河南獄。妃錄司農寺。唯有芳氏女。屏履布衣。往來供饋。徒行頓色。傷動人倫。中外咨嗟。目爲勤孝。王之二子。配在舊州。及六道使之用刑也。長曰行遠。以冠就戮。次曰行芳。以童當捨。芳啼號抱行遠。乞代兄命。旣不見聽。固求同盡。西南傷之。稱爲死悌。君子謂勤孝者。仁之厚也。死悌者。友之難也。感神者。誠之至也。此三者。有以見義陽之義方。賢妃之內訓。繼體之崇德。夫如是。淳美上歸。夫本朝。盛烈延耀。乎邦族。安可闕而不飾。碑版無文而已哉。銘曰。

高邱白雲。維堯大理。函谷紫氣。維周柱史。百代福流。千齡運起。富有海內。貴爲天子。聖帝才子。於穆紀王。賢王祚胤。倬哉義陽。慎徽九德。九德有常。允釐三郡。三郡以康。明夷於飛。丹崖之下。梁木其壞。桂林之野。不識阡陌。無存松檟。予以求之人。無知者。哀哀孝子。眷眷靈夢。語妙常閤。文微甄仲。南洛占從。東洲億中。舊窆移褊。新棺改贈。旣克返葬。以祚山陵。卜云其吉。神心允憑。人非地是。迹謝名稱。青青松栢。不顯不承。

贈太尉益州大都督王公神道碑奉勅撰

維天命帝子萬邦。維坤配乾。乾母萬物。以親九族。后父之屬尊。以敍百官。開府之班最。執謙德而光重地者。則祁國公其人也。公諱仁皎。字鳴鶴。太原祁人。王子賓天。啓靈仙之族。司徒衛漢。大忠義之門。盛德之後。仁賢繼出。曾祖景孝。隋屯田侍郎。祖詮。歙縣男。贈汾州刺史。考文洎。贈右僕射。纘戎前烈。啓迪後人。公之生也。膺汾霍之禎。體敦龐之度。禮樂狃於代襲。忠孝萌於自然。克寬克恭。不激不傲。鑿窮未兆。而養之以蒙。智周無際。而處之以默。故質勝於文。行過於譽。其隱德也。三年不鳴。其會時也。一日千里。初以翊衛。調同州參軍。換晉州司馬。應將帥舉。授甘泉府果毅。遷左衛中郎將。上昇春宮。后正妃壺。擢將作大匠。事時工練。八材孔修。轉大僕正卿。驩訓車攻。六飛如舞。先天內禪。引伸外戚。懷柔畏滿。厭劇思閒。公既深辭。以職事上亦優之。以散秩。乃加特進。禮異羣公。乃拜開府儀同三司。策上柱國。封祁國公。邑戶三千。實賦三百。公於是寓情宴喜。簡跡朝行。入告嘉猷。密而人莫窺也。陰薦多士。晦而人莫知也。不自異於當路。每同塵於衆流。常語所親曰。明明天子。擇賢共理。瓊瓊姻婭。則無膺仕。不識不知。樂我而已。善矣。夫人臣位極。遇莫大焉。王曰外舅。厚莫重焉。而能明道若昧。進道若退。事不事而縣解。爲不爲而理會。一以無目牛之全。一以無亢龍之悔。所謂言合古行中權歟。後之人慎終始而保福祿者。固將沿通波而蹈高軌也。享年六十有九。開元七年四月戊寅。薨於京師。皇上悼焉。設次大臨。輟朝累日。榮之以華袞。寵之以飾終。追贈太尉。益州大都督。賜東園秘器。含榿贈錫。率加常禮。乃命尙書彭城侯劉知柔。攝大鴻臚。俾之監護。京兆少尹崔琬介焉。申命詹事南安侯龐承宗。持節弔祭。左庶子白知慎。倅焉。公卿命士。更弔迭唁。溢巷填街。

爲之縞素。粵以十月初吉。葬我昭宣公。羣官執紼。祖奠國門。如前會。夫天作聖合。必起大邦。故軒妃美於西陵。周婦表於東海。公藩衍之慶。祥膺二十。或哲或謀。或肅或父。永錫之類也。如是元女祥發。望雲業參。練石內被。螽斯之德。外偃關雎之化。門風之至也。如彼長子。惟力戴君。畢心禦侮。奉雲雷之會。懸日月之功。庭訓之致也。如此高陽有才子八族。我盈其二。武王有理臣十人。家出其兩。稽諸舊史。罕或前聞。若乃積三盛事。而重之以純德。篆於金石。垂於億萬。宜哉。其文字光華。撰錄旨要。則皇帝所爲也。詞臣奉詔作之。其銘曰。

於穆祁公。誕靈信厚。有倬其慶。天之外舅。高以卑牧。盈將冲守。忠焉孝乎。沒而不朽。人之忠孝。其德不回。天俾純嘏。大福時來。貴踰九列。榮並三台。祚之元社。帝曰欽哉。祁公之德。柔嘉維則。令儀令色。小心翼翼。如何昊天。喪此邦式。休問其永。豐石是刻。我思肥泉。孝心罔極。

張燕公集卷十五

碑銘

贈太尉裴公神道碑

星辰懸象。所以殷時布氣。然而行不言之道者。天也。文武用才。所以勤官定國。然而致熙爲之理者。帝也。當高宗之休運。任名世之良臣。清九流而闢四海。代天工而張帝德。歷選前哲。豈多乎哉。公諱行儉。字守約。河東聞喜人也。其先出乎嬴姓。伯翳之後也。秦則裴侯始封。漢則侍中受職。魏晉之代。鬱爲盛門。八方於八王。聲振海內。三子尊爲三祖。望高士族。自冀州刺史徽。至公十二代。中軍將軍雙虎。至公六葉。代無違德。不隕厥門者已。大王父伯鳳。周驃騎大將軍。光汾二州刺史。琅琊郡開國公。大父定高。大將軍馮翊郡守。襲琅琊郡公。諸侯受封。山河傳國。天子共理。循良克家。考仁基。隋左光祿大夫。以陰圖王充。仗義舊主。遭時不利。玉折名揚。聖唐龍興。旌淑勵節。贈原州都督。命諡曰忠。蓋春秋之褒也。公清明本乎世德。正性出乎胎教。氣潤河靈。貌雄岳立。仁孝之道。天生而知。將相之氣。與年俱長。以高蔭爲宏文生。絕事篤學。累年不舉。房僕射異而問焉。對曰。隋室喪亂。家乏典籍。館有良書。探討未遍。故少留耳。梁公驚曰。驥子志氣凌雲。當一日千里。其早爲通人之目也。如是。明經。補左屯衛倉曹。詔舉。轉雍州司士。遷金部戶部二員外。歷都官郎中。長安令。明慶中。與長孫太尉褚河南。論及中宮廢立。國家憂患。有公伯寮。潛行於季氏。

出爲西州長史。又改金山副都護。又拜安西大都護。西域從政七八年間。窮荒舉落。重譯向化。我之獨賢。邊之多幸。乾封歲。徵爲同文少卿。尋除司列少常伯。官復舊號。爲吏部侍郎。加銀青光祿大夫。自居銓管。大設綱綜。辨職差才。審官序爵。法著新格。言成故事。上元中。長星出天。禿髮入塞。詔公爲洮州道左軍總管。又爲秦州鎮撫右軍總管。並受元帥周王節度。雖祭公有諫。耀武之士不行。而方叔帥師來威之道備矣。儀鳳二年。十姓可汗。匈奴延都支。李遮旬。潛構犬戎。俶擾西域。朝廷憑怒。將行天討。公進議曰。敬元敗績于茅戎。審禮免胄而入狄。豈可絕域。更勦王師。今波斯王亡。侍子在此。若命使册立。卽路由二蕃。便宜取之。是成禽也。高宗善其計。詔公以名册送波斯。兼安撫大使。公往蒞。遺愛洽於人心。是行也。百城故老。望塵而雅拜。四鎮酋渠。連營而諮酒。一言召募。萬騎雲集。公乃解嚴以反謀。託獵以訓旅。誤之多方。聞其無備。裹糧十日。執都支於帳前。破竹一呼。鉗遮旬於麾下。華戎相慶。立碑碎葉。蓋美克雋不殺而用謀。安人以德而去害。廓氛禳於地表。燁皇靈於天外。充國有屯田之頌。竇憲有燕山之銘。詢茲遠略。彼何微也。遷禮部尙書。加上柱國。又特降恩命。兼右衛大將軍。夷典秩宗。神必據我。文昌有將。天道存焉。調露中。單于可汗伏念外叛。大鴻臚蕭嗣業喪律。詔公爲定襄道大總管。軍至朔州。斥候相接。匈奴故態。狙刼糧以餒師。神將出奇。張虛勢以陷敵。乃僞爲轉運。伏其壯士。示羸師以緩行。隱精騎以躡迹。寇果大下。援兵奔散。驕虜益驚。自爲得色。馭此重牛。憇彼井泉。於是箱中兵起。千弩齊發。要路騎飛。一息而至。羣敵顛沛。殺傷滿野。從茲饋運。路無驚者。觀夫大漠無睨。穹廬靡所。追之逃遯。捨之憑陵。費日老師。兵家所病。公潛使緩

類均其利心。深圖既入，狼意亦改。及委罪銜官，陰送降狀。公密上其事，人莫知之。及如其期，舉國歸附。煙塵大起，師徒惶惑。公徐使令軍曰：「此是伏念執溫傳來降，非他寇也。」俄而銜壁轅門，釋縛納款。帝嘉厥勳，命尙書崔知悌乘驛勞軍，備禮獻凱。策勳之日，程務挺、張虔勗者行軍之偏將也，訴言子營逼逐，方降大軍。又屬秉鈞忌才，下上其手。公曰：「雖不逮卒師之讓功，猶恥二王之競力。今而殺降，後無來者。」乃封公開喜縣開國公，而伏念溫傳皆戮都市。是年也，伏念弟九珍擁其餘種復叛，則天稱制，追正宿枉，贈伏念太僕卿。程張諸家別故夷族，君子以爲神理之不可誣也。永淳九年，詔公爲金牙道大總管，未行，遘疾。四月二十八日薨於京師，延壽里。春秋六十有四。長子貞隱早卒，嫡孫參元嗣封。藐視諸孤，哀哀童幼。高宗悼焉，贈幽州都督，賜凶儀還鄉，喪葬官供。禮部郎中監護，窀穸之數，率禮有加。別勅留守，委皇太子擇六品京官一人檢校家事。五六年間，待兒孫稍長，成日停寵，極哀榮禮之厚者。澤及存歿，義莫重焉。太常議諡博古多能，文武表式。曰憲，其年十月葬。我憲公於聞喜之東良原禮也。神龍中興，朝思舊德，贈公揚州大都督。開元孝享，宰嗣廷恩，贈公太尉。生不登乎台階，歿追位乎霧宰。序四時于地下，調三光于天上。聖人神教，意在茲乎。公志堅慮精，神勇識澈，藝必討本，學皆觀奧。又善測候雲物，推步氣象，鬼無遞謀，靈不藏用。著文集二十卷，造草字數千文，皆寶傳人間，以爲世法。又撰選譜十卷，又爲軍營行陣部衆料敵等四十六訣。大聖天后，令秘書監武承嗣就家收進，以爲秘術。豈比馬卿浮華，唯留封禪之草。劉安虛誕，空傳鴻寶之書而已哉。加以汲引沉淪，推獎氣類，虛懷而襟帶不設，宏亮而城府洞開。故虎旅雲從，詞林響應。

若毛羽之宗麟鳳。衆川之長江河也。在選曹。見駱賓王。盧照隣。王勃。楊炯。評曰。炯雖有才名。不過令長。其餘華而不實。鮮克全終。見蘇味道。王劇。歎曰。十數年外。當居衡石。後各果如其言。在軍。麾。擇帳下之士。則有張知運。薛訥。閻敬容。甘元。陳裴。恩。諒。王智方。呂休。景。劉元意。引偏裨之將。則有程務挺。張虔。勗。王方翼。崔智。晉。党。金毗。郭侍封。劉敬同。李多祚。黑齒常之。凡所進拔。盡爲名將。此則有道之人。倫。武侯之賞鑑也。公之送波斯也。入莫賀延磧中。遇風沙大起。天地暝晦。引導皆迷。因命息徒。至誠虔禱。徇於衆曰。井泉不遠。須臾風至。氛開。有香泉豐草。宛在營側。後來之人。莫知其處。此乃耿恭之拜井。商人之化城也。公在禮闈。勅賜善馬及寶鞶。令史奔馳。馬倒鞍破。懼而逃罪。公使召之曰。知汝誤耳。又平都支遮旬。大獲珍異。會長將吏。請遍觀焉。有馬腦大盤。希代寶也。隨軍王休烈。捧盤跌倒。應時而碎。叩頭流血。惶怖請死。公笑曰。事有不意。何至重玉而害人乎。此又文饒之含容。邴吉之仁恕也。公西擒都支。北降伏念。前後錫馬五百匹。僮二百人。金銀器物三千品。錦罽織皮六百段。公受置庭中。旬日散盡。此又趙盾之待士。田文之市義也。若夫知人以爲本。感通以爲行。善貸以爲常。散積以爲樂。古之有道者。嘗從事於斯矣。公元夫人。河南陸氏。兵部侍郎爽之女也。陸氏卒。繼室以華陽夫人。庫狄氏。有任如之德。班左之才。聖后臨朝。召入宮闈。拜爲御正。中宗踐阼。歸養私門。歲時致禮。媾后補天。進參十亂。少康嗣夏。退協三從。晉朝公卿。列拜虞諱之母。周官音注。近出韋逞之家。皇上臨極。旁求陰政。再降綸音。將留內輔。夫人深戒榮滿。遠悟真筌。固辭羸敗。超謝塵俗。每讀信行禪師集錄。永期遵奉。開元五年四月二日。歸真京邑。其年八月。遷窆於終南山。

鷓鳴堆。信行禪師靈塔之後。古不合葬。魂無不之。成遺志也。長子參元。官至涇鄧二州刺史。聿修厥德。人亡道存。次子延休。汾州汶水令。世載文雉。家傳草聖。次子慶遠。協律郎。深達禮樂。克和神人。咸負長才。同淪短運。季子光庭。侍中兼吏部尚書。輔政邕熙。致君堯舜。孝理發乎陵廟。仁澤遍乎松檟。是故妻以夫榮。母以子貴。以尚書先贈方伯。申命上公。夫人舊封華陽。增號晉國。詩云。文武吉甫。萬邦爲憲。上公有焉。又曰。彼美孟姜。德音不忘。小君有焉。孝經云。立身行道。以顯父母。侍中有焉。合三德而爲家。橫百世而濟美。信可以言時稱代。鏤石刊金者歟。神道前銘。薛令所撰。且有後命。俾余係述。馬遷世家。益孟堅之一傳。劉寬表墓。並伯喈之兩碑。報德教忠。俱傳不朽。銘曰。

天生亞聖。祚此王國。文綜九流。武參七德。柔遠服叛。窮西盡北。赫我皇靈。去其蝥賊。仁則不遠。智何不周。如山之峻。如川之流。術與神合。藝將道遊。書來懸帳。賦出登樓。司馬軍陣。官人綱紀。帝嘉常伯。國於聞喜。室有令妻。家成克子。社金傳世。桓珪守祀。神爲上台。永介邦祉。

故開府儀同三司上柱國贈揚州刺史大都督梁國公姚文貞公神道碑奉敕撰

敘曰。八柱承天。高明之位定。四時成歲。亭育之功存。畫爲九州。禹也。堯享鴻名。播時百穀。棄也。舜稱至德。由此言之。知人則哲。非賢罔乂。致君堯舜。何代無人。有唐元宰。曰姚文貞公者。位爲帝之四輔。才爲國之六翮。言爲代之軌物。行爲人之師表。蓋維岳降神。應時間出者也。公諱崇。字元之。姚姓有虞之後。遠自吳興。近徙於陝。今家洛陽焉。烈考長沙文獻公。樹勳王室。建旗舊府。公紈綺而孤。克廣前業。激昂成學。榮問

日流。武庫則矛戟森然。文房則禮樂盡在。弱冠補孝敬挽郎。又制舉高第。歷佐濮鄭。並有聲華。入爲司刑。承天授之際。獄吏峻密。公持法無頗。全活者衆。進夏官員外郎。郎中侍郎。朝廷曰能。遂掌軍國。遷鳳閣侍郎。監修國史。兼相王府長史。始則天人讓王。承置醴之顧。終以飛龍利見。延驂乘之恩。自時厥後。恆當大任。凡三處兵部尚書。三人中書令。一爲禮部尚書。左庶子。又肅政大夫。總靈武軍兵馬。又司農卿。知隴右監牧使。出典毫宋。常越許中。徐潞揚同十郡。景雲初。以蕃邸舊寮。封梁國公。食賦百室。公性仁恕。行簡易。虛懷汎愛。而涇渭不雜。眞率徑盡。而應變無窮。常推是心。以御於物。故所蒞必毗庶風偃。驚很化從。言不厲而教成。政不威而事理。去思覩頌。來暮聞歌。既登邦政。卒乘輯睦。及在宗伯。神人允諧。今之中書。是爲理本。謀事兼於百揆。論道總於三台。公執國之鈞。金玉王度。大渾順序。休徵來臻。懋德格天。名遂身遜。拜開府儀同三司。崇其秩。逸其志也。初太夫人在堂。公受任西掖。頗限扁禁。求侍晨昏。優詔旣許。尋令還職。公固請以泣。制曰。家有令弟。足慰母心。國有棟臣。安可暫缺。其後剖符江表。敦諭起復。衰麻外墨。纒棘內毀。變禮中權。通識所貴。神龍之首。與聞興復。疇其非賦。累讓而停。夫以革故鼎新。大來小往。得喪而不形於色。進退而不失其正者。鮮矣。君子曰。忠不忘親。仁也。哀不違事。義也。讓功辭邑。禮也。濟代全名。智也。仁以長人。義以和下。禮以安上。智以周身。宜其光輔四帝。軒冕三紀。池臺琴筑。優游暮齒。傳爵土於祚胤。保祿位於終始矣。享年七十有一。開元九年九月。寢疾薨於東都之慈惠里。皇上悼焉。國人慕焉。撫牀輟舂。曾未云比。制贈揚州大都督。諡曰文貞。禮也。十年二月。葬於萬安山之南原。在疾也。王人賜膳。御醫視藥。

於薨也。中使弔臨。羽儀哀送。君臣之義。厚莫重焉。子昇奔思。綴遺美。以真罔極。有詔掌文之官。敘事盛德之老。銘功將以寵宗臣。揚英烈。帝乃洒恩。仙翰鏤澤。日。月。照。臨。於。佳。城。烟。雲。變。態。於。神。道。寶。其。文。字。別。爲。羣。玉。之。山。禁。其。樵。蘇。卽。表。三。司。之。墓。銘。曰。

源深自虞。派別從吳。避地魯陝。居家洛都。神明遠契。岳瀆冥符。翌聖斯偶。生賢不孤。仁將勇濟。孝與忠俱。學刃攢植。文鋒迅驅。纔安卑位。卽騁長途。唯實唯有。若虛若無。再三軍國。一二訐謔。戎柄尤重。王綸最樞。兼司任切。久政榮殊。黼藻彌煥。丹青靡渝。以寬容物。以鑒分區。外或形放。中恆禮拘。箴雖誠口。諍亦忘軀。但覩渾璞。誰詳瑾瑜。伊咎尺寸。管樂錙銖。名正身遂。言誠願孚。方辭漢祿。更辱齊組。旣積而散。窮權盡娛。川歸東極。日去西晡。上惻旒旻。旁悲路衢。藍田美玉。荔浦明珠。載廣休慶。爰宏典謨。豐碑乃立。盛業其鋪。帝念頻軫。仙毫特紆。鐫金刻石。鳳篆龍圖。七耀光動。三泉澤濡。銓能敘事。理鬱詞敷。求舊銘實。慙殫戀蕪。緬思雲霧。尙想江湖。有道之德。其何以踰。延陵之墓。空此嗚呼。存沒終始。遐哉邈乎。

唐故夏州都督太原王公神道碑

良玉禮神。用之西序之器。捨之南山之璞。罔然不有其珍也。君子安命。進之于城之雉。退之去國之老。隕然不失其正也。語夫仗運以行道。屬辭以比德。亦何代無其人哉。公諱方翼。字仲翔。太原祁人。王周之後也。王子以敗狄受姓。徵君以遜世爲名。司徒之濟艱難。義形漢室。太尉之圖舉甲。心盡魏朝。聞蔣濟所言。則知尙書志力。兄弟繼美。覽周書所載。則見潁川忠烈。子姪皆封。臣節奮揚於百代。家聲藉甚於四海。大

王父司徒定公乘隋氏之崇也。王父駙馬開府文公裕先朝之懿也。考特進慎公仁表王室之甥也。公門總四岳之靈。帝子分五潢之氣。是生時傑。鬱爲仁紀。公雄姿沉毅。凜難犯之色。虛懷信厚。坦招納之量。識略精斷。遠應變之權。神守密靜。堅不奪之節。孝友內兆。於免懷忠。敬外灼於旣冠。加以思叅造化。誠合鬼神。文其詩書。武其韜略。推此才也。以從政焉。永無匱矣。夙遭家難。哀過柴瘁。京師號曰孝童。王母同安長公主。引貴遊之誠。示作苦之端。今太夫人徙居鄆墅。儲無斗粟。庇無尺椽。公躬率傭保。肆勤給養。墾山出田。燎松鬻墨。一年而良疇千畝。二年而厦屋百間。三年則日舉壽觴。厭珍膳矣。處約能久。不亦仁乎。在困能亨。不亦智乎。永徽初。始宰安定。誅豪暴以育人。察奸宄以伸冤。異政三舉。清風一變。除潮海都護府。司馬以母疾辭職。爲姜恪乘便。遂徙朔州。尙德府果毅。歲餘。王本立上書理公國之悖老。不宜擯抑。有詔徵還。而親不待心。與哀絕氣。屬禮存。詔御醫孟默。朝夕診視。免喪逾年。僅堪履立。樂成公東討新羅。薦爲將帥。詔公持節。雞林道摠管。軍停不行。授沙州刺史。未至。改拜肅州。以爲慢防啓寇。非重閉也。乃大築雉堞。嚴備櫓械。人知有恃。戎亦來威。儀鳳歲。河西盡蝗。獨不入境。隣郡湊稔。提挈如雲。公傾私泉以資乏。引激水以立礎。舉火百竈。日餽千人。遂有芝草。藜生。豐年屢降。人之詠德。刊石存焉。裴吏部立名波斯。實取遮匄。偉威厲。飛書薦請。詔公爲波斯軍副使。兼安西都護。上柱國。以安西都護杜懷寶爲庭州刺史。大城碎葉。街郭迴互。夷夏縱觀。莫究端倪。三十六蕃。承風謁賀。自泊汗海東肅如也。無何。詔公爲庭州刺史。以波斯使領金山都護。前使杜懷寶更統安西鎮。守碎葉。朝廷始以鎮不寧蕃。故授公代寶。又以求不失鎮。復

命寶代公。夫然有以見諸蕃之心搖矣。於是車薄啜首唱寇兵。羣蕃響應。蝟毛而豎。公在磧西。獻捷無虛歲。蹙車薄於弓月。陷咽麪於熱海。勦叛徒三千於麾下。走烏鶻十萬於域外。皆以少覆衆。以誠動天。葛水暴漲。祭徹而三軍涉渡。葉河無舟。兵叩而七月冰合。由是士卒益勇。戎狄益懼。璽書下問。皇靈遠燦。遷夏州都督。徵詣奉天宮。熱海之役。流矢貫臂。陣血染袖。事等殷輪。帝顧而問之。視瘡歎曰。爲國致身。乃吾親也。妖賊白鐵余。據平城以反。奉詔與程務挺討擒之。善公有發石壞城之計。反風焚柵之感。封太原郡公元珍寇邊。受命討擊。公以無甲。乃發思造六片木。棊袴開鈕解合。畫爲虎文。北至開光。與虜合戰。若駟猛獸。蒙臯比莫之敵也。胡馬奔駭。獲其二啜。桑乾舍利。兩部來降。初公善書。與魏叔琬相輩。公善射。與趙持滿齊名。帝每矚之。賜比鳴犢。賞深懸帳。嘗獨行夜入。有恠人長丈。直來趣逼。射而仆焉。乃朽木也。太宗壯之。授右千牛。及持滿伏法暴骸。公哀而收葬。爲執金吾。奏劾高宗義之釋而不罪。履道坦坦。多如此類。迺將任帝夔龍。爲國方虎。天下膏潤。羣生雲雨。惜哉不辰。悄焉遘侮。嗣聖之際。天后臨朝。有凶人誣奏公。廢后從兄。常懷快怏。司刑御史。侮文矯制。不名等法。遷於崖州。路至衡州。寢疾捐館。春秋六十有三。垂拱三年閏正月二十九日。葬於咸陽原。君子曰。斯才也。斯望也。難乎免於斯之代也。周公聖而謗。屈平賢而放。賈誼才而謫。李廣勞而喪。彼天命之糾紛。此人情之惆悵。神龍中興。以陷酷吏例。復官爵。孝爲人極。忠爲令德。神之聽之。始枉終直。信矣。有子故光祿少卿璵。今秘書監珣。皆篤行純孝。慎終思遠。說少也。蒙會堂。今老矣。豈能文旌墓。遷司漢籍。感激論都尉之書。篋鼓彪情。追美樹楊公之碣。銘曰。

上德惟公。氣秀才傑。孝宏世美。忠廣前烈。日月心照。江河思決。難地必通。暗機先徹。卓犖文藝。崢嶸武節。歎由宰邑。借恂臨郡。海女避途。山虵可問。師律三總。軍聲六振。銳氣入營。長雲出陣。肅將國威。烜赫天外。玉弩方擎。雲旗卷旆。天道茫茫。自古多傷。功存西域。身棄南荒。易簣中路。懸棺反藏。寶刀生衣。玉玦無光。後有才子。先賢不忘。

張燕公集卷十六

碑銘

河西節度副大使鄯州都督安公神道碑

公諱忠敬。字某。武威人也。軒轅帝孫。降居弱水。安息王子。以國爲姓。世高之遠。漢季。自河南而適遼東。高陽之受魏封。由陰山而宅涼土。高陽王同。生尙書左僕射。河間公原暉。眞。河間生建節將軍。西平公纘。從正。西平生龍驤將軍。黃門侍郎。廣宗侯。薛晤。微。累葉勳華。載於魏史。高祖何藏器。廣宗之子也。周開府儀同三司。寧遠將軍。肅州刺史。張掖郡公。曾祖羅方大。隋開府儀同三司。皇朝贈石州刺史。貴鄉公。祖興貴。右武侯大將軍。涼州刺史。徙封榮。涼歸三國公。考文生不仕。涼公皇連。經綸。首平李軌。大舉河隍之地。遠通城郭之國。寵錫蕃庶。冠絕等夷。水出渥洼之文。神馬者二千乘。山得崆峒之武。朱輪者四十人。公育榮盛之門。鬱豪爽之氣。孝友天至。清華玉立。幼聚兒童。必爲軍陣之戲。長交英俊。唯談韜略之書。始以良家子。僕射韋公。待價引於帳下。安息軍建奇績。解褐授游擊將軍。臨洮府右果毅。復以善部統。御史大夫。唐公休璟。處之前鋒。洪源谷立異効。遷右威衛翊府右郎將。兼新泉軍使。進本衛中郎將。赤水軍副使。兼赤水新泉兩軍監牧使。改會州刺史。營田使。換松州都督防禦使。遷左司禦率。兼河西節度副大使。臨洮軍使。轉鄯州都督使如故。其在軍州。傾心下士。視人如子。無約而親附。不言而條理。其在農牧。大田多稼。如

茨如梁。思馬斯才。有驕有皇。輸力四朝。歷官三紀。名參禁衛。身任疆場。以靜揔繁。以逸待寇。我無亡鏃之費。敵有不戰之屈。茲所謂一方之干城者也。享年六十有六。開元十四年十一月二十八日。寢疾終於位。知與不知。莫不隕涕。十五年某月。葬於烏城之南。志公鄉。祔先塋也。公寬以御衆。卑以自牧。直而無訐。廉而無劔。朋友不聞臧否之言。家人不見喜愠之色。加以心淨三業。躬勤八戒。推是而行。何往不濟。初甘州有舍利。沙多禪師道場之四果也。嘗云檀越德充於內。神護於外。雖冒鋒鏑。永無害也。及百戰之後。啓手歸全。西州士人聞之。激厲有子仲璋。如璋。季璋。金璋。重璋。庭襲芝蘭。喪過變棘。敬奉窀穸。備禮儀於文武。撰述家風。刻功名於金石。詞曰。

玉關氣爽。金波秋澈。涼野蕭條。寒山積雪。授靈產義。精勁才傑。孝固純深。忠惟剛烈。負羽從軍。奮飛青雲。麾幢按部。惠流時雨。總軍扶郡。入文出武。三十年間。式遏戎虜。疆場務靜。非公莫鎮。金鼓氣雄。非公莫震。神山與缺。龍池取駿。霹靂陷營。衝風入陣。勇將知時。仁兵善持。反耕罷戰。王者之師。牧馬如雲。屯庾如坻。西軍方壯。東首長辭。振古同嗟。沒而不死。所謂明德。永傳神理。鐘鼎題門。珠玉名子。信言豐石。令問不已。

河州刺史冉府君神道碑

昔者堯舜既沒。文武將墜。天縱孔聖。誕敷皇極。于是乎恢六藝而正王道。舉十哲而闡微言。雍也爲德行。之目。求也爲政事之首。吾見乎龍翰鳳雛。百代而共貫。虎符犀節。重世而增華。明德之後。知其必大。公諱實。字茂實。其先魯國鄒人也。古天子有相氏。宅於相土。實曰冉姓。蓋氏族之興舊矣。不常厥所。今爲河南

人焉。五代祖睢陽公諱道周。尙齊南康公主位平南將軍散騎常侍。荆州刺史。信州都督。高祖諱軫。仕梁太子左內率。荆州刺史。齊梁之間。荆巫重鎮。世善其職。江漢宜之。大曾父義城公諱黎。在梁雲麾將軍。湖州刺史。入周拜驃騎開府儀同。至隋開皇中。爲旭州刺史。大父黃國莊公諱安昌。隋啓平城。祚之穀壁。唐分蜀國。瑞以桓珪。其後改封於黃。授信州刺史。歷潭州總管。贈夔州都督。烈考天水郡果公諱仁才。秩金紫光祿大夫。婚皇室漢南縣主。經浦澧。袁江陵永。凡六州刺史。偉矣哉。承嘉善慶。歷代名臣。流風載於史官。勲業藏於王府。公卽果公季子。天王自出。內稟胎教。混成之姿。外被門風。式瞻之訓。從容合度。造次皆法。生而知之。孝弟也。學而知之。禮樂也。德義如山。文章如泉。搢紳之士。仰爲宗焉。弱冠文學。生進十擢第。遭家不造。府君捐館。五日絕漿。三年泣血。雖麻葛就禮。而欒棘加人。服闋。調并州大都督府參軍事。丁太夫人憂。過哀終喪。有如前制。應八科舉策。問高第。授綿州司戶參軍。轉揚州大都督倉曹參軍。又舉四科。敷言簡帝。除益州導江縣令。鴻漸二鎮。翰飛三蜀。府中之孫子。荆郡內之岑公。孝。用能。據淮距海。我庾如坻。岷山導江。入境先歎。加朝散大夫。除鄜州長史。仍加關內道支度使。去青城之洞府。來白帝之鄜時。命服有輝。使車何重。除婺州司馬。入謝于武成殿。主上以邊庭有事。喜問陳湯。宣室清言。思逢賈誼。公召對蘊藉。謀慮深長。眷甚前席。恩加後命。因改恆州長史。于時四鎮未復。二蕃猶梗。屯田遶塞。戎馬生郊。代郡藏符。臨冀北而誠重。漢家張掖。比西河而還輕。乃徙拜涼州都督府長史。仍知赤水軍兵馬。河西諸軍支度使。地壯伏龍。城雄飛鳥。位居刺史。總管三邊。公乃利澤。漉懋蘆葦。序芟蕞。積糗糧。均轉輸。程力役。寬御

悅使授方任。能人胥忘其久勞。兵不遠其長道。雖金方氣肅。雨雪不交之地。磧路沙礫。草木不植之所。莫不豐滯穗于坳牧。厭甘瓜于戍時。朝廷賴之。遷使持節河州諸軍事。河州刺史。仍知營田使。崆峒連五郡之壤。磧石控九河之源。公夙奉皇華。政聞行露。高車未至。闔境相歡。既見君子。溫其如玉。率性仁愛。由衷易簡。推是心也。物感斯應。覩恭肅而無兢。見禮義而興行。不言而庶事熙。非教而羣下順。故得大田多稼。人和歲豐。餉軍廩師。處勤餘裕。計偕入朝。侍宴于長壽殿。上謂公曰。河州軍政要衝。屯以最多。卿以足食爲心。朕無西顧之憂。侑以彩幣。錫以文袞。及公還州也。璽書勞勉。王人相繼。國家徑流沙。梁弱水。收西域。護南庭。連百萬之兵。以濟事于外。不一日而乏者。則公之力也。無駭入極。可謂費庠父勝之。杜預平吳。蓋知羊叔子功爾。宜登元老。作貳天朝。止于邊服。實孤人望。享年七十有一。證聖元年二月十日。寢疾終于官舍。天子悼焉。凶費喪歸。悉命官給。是日河湟耆老。山谷羌夷。反首罄面。號奔州邑。雖國亡子產。吏哭祭遵。豈云過也。愷悌之化。人之父母。及其歿也。哀亦如之。信矣。太夫人金城郡君隴西李氏。江夏王道宗之女也。宜此象服。爛其盈門。嗣先姑之徽音。立庶姬之則範。薜華旋落。藁瘞城隅。以證聖二年正月。合葬于河南之定鼎原。禮也。天使馬悲。啓滕公之室。人看鶴舞。閉玉女之墳。松柏接于邙山。邱陵封于伊闕。石麟將鬪。華表何年。有子曰祖雍。景龍初擢給事中。兼侍御史。內供奉。追惟皇考。孝于奉親。忠于事君。恭于立身。惠于臨人。總是四行。旁通具美。貽厥孫謀。以燕翼子。故老之口既絕。竹帛之文又滅。揚名兮奈何。刊石兮來裔。其詞曰。

倬哉冉氏。世有仲弓。鐵冠繡服。給事于中。克昭遺懿。樹之家風。於皇嚴孝。高明有融。德罔不尊。藝何不涉。嗣武先正。思文載協。建旗千里。逮君六葉。龜顧印房。蛇盤綬篋。官以勤積。業因時峻。宰號神明。椽稱親信。驥足旣展。熊軾亦輒。邦國海康。京師河潤。出車西域。我君謀之。屯田北假。我君護之。六軍有饋。其誰度之。一人無憂。其誰樂之。猛獸避德。均遷所莅。靈鳥依仁。霸昇執事。以今視古。名齊績類。天不愆遺。山頽此位。隴首迴望。秦川斷腸。吏人攀紼。哀鴈隨喪。虛靈奠野。行臨惟堂。廟立邊郡。魂歸故鄉。王姬祔葬。禮之終也。水合蛟龍。墳同石馬。地積霜露。烟攢松檟。千載九原。高碑淚下。

贈太州刺史楊君神道碑

公諱至誠。字某。宏農華陰人也。厥初生人。爲姬伯之祖。因邑命氏。有楊侯之胤。其後東陵奮而開國。西漢盛而移關。門廬隱隱。亘連桃塞之上。碑闕崑崙。蔽滿華山之下。明德之後。世有人焉。大王父隋直閣將軍。岷蔚撫臺道五州刺史。邢國公諱貴。大父故右衛副率。慈汾二州刺史。靜公諱譽。考故常州刺史。工部侍郎。鴻臚卿。金紫光祿大夫。散騎常侍。太子少師。贈儀同三司。上柱國。鄭國懿公諱崇敬。若夫家聲代業。累德積仁。故以克隆前統。光啓來葉矣。公稟純嘏之粹靈。漸軌物之名教。端操以正己。崇讓以與人。勵精以探道。善問以毓德。學無不達。藝無不周。成童有傾矚之望。旣冠爲宗匠之表。年十三調太常挽郎。尋補路王典籤。大夫門子。執紼橋山。王國詞人。曳裾睢苑。皆一時之選也。明慶中。詔郡國舉賢良。公對策天朝。無能出其右者。遷太子通事舍人。再舉高第。徙國子監丞。坊監清流。才地兼擇。東朝東帶。銀榜增華。西序彰

纓環林益潤。高宗接千歲之統。嗣百王之業。封岱岳。禪云亭。稽于舊章。俟茲通博。乃除公禮部員外郎。祀事克明。大典攸序。建邦分職。得人者昌。吏曹居六官之首。丞郎盡一臺之妙。又轉公吏部員外郎。準的文昌。羽儀丹地。丁太夫人憂。去職。公至行純篤。幾於滅性。雖杖絰外除。而柴瘠加等。門人記其喪禮。天子憂其死孝。服畢。授幽州三水令。曳尙方之鳥。鳴單父之琴。志道不矜其大才。勤政無陋其小邑。美聲流於幽籥。惠化而於周原。又應文擅詞場。舉策試天下第一。敷陳聖謨。啓沃明主。究天人之際。建皇道之極。如有用我者。其爲東周乎。朝廷納賈生之言。排汲直於外。乃拜公隴州司馬。未及赴官。遭疾卒於長安之私第。春秋若干。王祥未施於邦政。陳實近終於邑長。位不充德。其如命何。神龍初中。宗克復丕業。格於文祖。乃睠從臣。緬懷先正。以公二子在章綬之列。追贈公使持節。太州諸軍事。太州刺史。非夫立言不朽。陰德陽報。安有藐諸孤而降家。旣沒世而榮號者哉。夫人天水趙氏。殿中監武權公某之女也。受訓公宮。作合君子。言容貴於國史。德行循於法度。六姻之內。宗焉始有輔佐之力。卒延門戶之寄。初公之捐館也。九子呱呱。哀衰喪位。賴夫人實顧實復。日就月將。徙宅依仁。闔門成訓。三十年內。八子登朝廷。交虎綬之華。門接魚軒之軫。某年日月。封梁國太夫人。景龍二年五月七日。終於長安之延壽里。間者遭家遷播。几筵靡託。而今蒙國昭洗。情禮獲申。以先天元年十月二十五日。合葬於少陵原。禮也。第二第三子。夫人在堂而沒。長子第八子。夫人在殯而亡。今並列於塋兆。用嘉魂魄。長子故兵部郎中徵。中子前武衛將軍泚。永懷徽烈。思勒銘頌。郎中昔嘗緒言。意感延州之許。將軍今復哀託。請深舊館之悲。高跡難名。短詞莫逮。採諸故

老。恭存梗槩。其詞曰。

昂昂楊君。秉心泉懿。大河靈岳。含光毓粹。學妙研精。文逾逸思。行爲時範。言爲故事。存蘊令德。沒揚虛位。善慶克家。哀榮乃備。嗣姑稱妯。敬妻曰冀。復有母儀。千載一致。貞墳土隴。同封此地。芳烈攸哉。金生碑字。

贈廣州大都督馮府君神道碑

夫積德垂裕之謂仁。追遠揚名之謂孝。仁則愛鍾厥後。孝則榮及其親。嘗三復于斯言。今于馮君而見之矣。府君諱君衝。其先長樂人也。釋趙歸秦。本家上黨。分燕徙越。又據高良。自遠祖榮懷化侯業。以至于大父贈荊州都督益。先考高州使君智弒。咸以勳績。建旗本郡。甲兵雄于一方。政化達于千里。君蘊含宏光大之德。守冲默安貞之志。乘難進易退之操。詣希聲若訥之道。爲而不有。故物譽難得而稱。靜以居常。故世榮無由而及。以聖歷之歲。終于本城。子幼家艱。喪禮蓋闕。夫人麥氏。備母師之六行。履先始之四德。處順思柔。以成婦道。及衛亡共伯。而魯重敬姜。誓以汎舟之詩。遵其闔門之禮。季子今冠軍大將軍。右監門衛大將軍。上柱國。渤海郡開國公。力士。始自齟齬。來儀上京。旣遠徙宅之懼。爰從倍年之訓。感三州之深義。易百代之因生。捨馮亭之本枝。從高徯之令族。千秋仕漢。遂去田宗。隨會在秦。別爲劉氏。遇風雲之感。會承日月之光輝。茅土答其勳庸。貂璫寵其忠信。太夫人踰越嶺嶠。就養高堂。孝子展白華之勤。慈母欣綵衣之貴。精神所感。振古難儔。噫。歟。資孝爲忠。隱心後動。引桑菴之深誠。慕金張之周密。敬以衛主。愛以安親。而善不彰。惠不遠者。未之有也。由斯言之。則哀樂存乎心。不至音改。禍福唯所召。不以偏覆。及詩

云魯侯燕喜令妻壽母。明神勞善人而壽其母也。夫人以開元十七年五月十二日壽終于京兆之來庭里舍。享年八十有七。天子悼先賢之晦德。嘉侍臣之克孝。思賙穉之未崇。愴寤夢之將及。于是詔贈先府君。潘州刺史。備禮飾終。招魂合葬。是歲也。大享宗廟。徧謁園陵。錫類之恩。施于卿士。重贈府君使持節都督廣韶循康等一十六州諸軍事。廣州大都督。夫人受邑舊邦。啓號南海。從夫加贈。改封越國夫人。哀榮備于始終。寵光洽于中外。爲子之道。何以加焉。于是與兄左衛中候元璉。右領軍衛郎將元珪等。惟舊業之難名。感新恩之薦及。思建碑表。以永芬芳。夫毓至德。以庇後嗣。仁之厚者也。揚令名。以崇祖考。孝之大者也。仁爲五常之先。孝實百行之首。貫經教而莫比。標人倫而獨出。宜其鏤美金石。式旌墳隧。無忘清徽。昭示來葉。何必會稽江上。獨有記孝之碑。安陵廟前。空傳尙德之頌。其詞曰。

明珠紫貝。產于南國。代所珍兮。允矣君子。不耀其德。克全真兮。慶流我後。高躔迴翥。中貴臣兮。朱幡象服。寵及泉路。榮其親兮。孝道不隕。勒銘表墓。留芳塵兮。

贈涼州都督上柱國太原郡開國公郭君神道碑奉勅撰

四時平分。清秋之氣勁。五方異俗。崆峒之人武。故隴上多豪。山西出將。其有雲龍感召。星象特生。金鼓登壇。隱如敵國。麾幢指塞。自比長城。得之于太原公矣。公諱知運。字逢時。其先太原著姓。今則晉昌人也。本乎文王之子。是爲毓叔。毓或云郭。因而氏焉。自燕昭尊隗。以築宮。漢祖封亭。以列國。其侯于陽曲。宅彼太原。舊矣。亭之元孫。友從太原。徙隴西。昭帝分隴西。置西平。郭氏又爲郡之右族。友之昆孫。武威太守。憲憲

之猶子散騎常侍芝。俱有名跡。見于魏晉。則晉昌諸宗散騎之後也。爾乃一門連譽。時人號曰三儒四海。齊名天下。謂之八顧。光祿派分于馬翊。廷尉世茂于穎川。孝則天錫釜金。忠則帝章冕服。仁則猛獸不害。信則兒童不欺。豈但介休見有道之碑。洛陽聞立德之傳而已。曾祖欽。瓜州大黃府統軍。上柱國。祖才。朝議郎。瓜州常樂縣令。上柱國。父師。朝散大夫。上柱國。贈伊州刺史。磧鹵之地。戎馬生郊。業戰鬪而宏勳。仕州縣而爲達。啓莫京之繇。福不在于其身。積無聲之善。慶必流于後嗣。公太白之精。雷泉之靈。膺家之禎。爲國而生。身長七尺。力能扛鼎。猿臂虎口。虬鬚鸞眸。射穿七札。劍敵萬人。子卿路逢。遙識將軍之相。唐舉一見。足辨封侯之骨。解褐以善戰。授昭武校尉。秦州三度府左果毅。以敗敵北庭。加游擊將軍。沙州龍勒府折衝兼右金吾郎將。瀚海軍副使。尋改朝散大夫。伊州長史。伊吾副使。以軍累破虜。卽授其州刺史。進當軍經略使。朝廷以未愜前除。且有後命。遷本衛中郎將。仍爲舊州軍使。默覈之寇北庭也。公奔命解圍。軍聲大振。加雲麾將。右武衛將軍。封介休縣開國公。食邑二千戶。開元二年。吐蕃入隴右。掠坰牧。公兵以奇勝。寇不復蹤。積甲山齊而有餘。收馬谷量而未盡。歸功廟算。朝議多之。拜右羽林將軍。持節隴右諸州節度大使。兼鄯州都督。河源軍使。鎮西陲。信國之藩屏。坐北落。亦王之爪牙。故入奉期門。出分閭寄。于是料敵無備。間其師老。潛軍一舉。大俘九曲。鑊甲文劍。熨馬犂牛。旣獻戎捷。遂頒朝賜。乃兼鴻臚卿。攝御史中丞。封太原郡開國公。加前食邑三千戶。執憲摠軍。典屬乘障。增爵益邑。遇厚恩深。俄而六州羣胡相率大叛。命公統隴右之騎。濟河曲之師。鋒鏑爭先。玉石俱碎。拜右武衛大將軍。授一子官。賜金銀器百事。雜

綵千段。班師臨洮。遭茲虐疾。嗟乎。匈奴未滅。宿志不伸。生也有涯。死而猶視。開元九年十月二十二日。薨于軍舍。春秋五十有五。蕃夷邊鎮。血面摧心。悲慘風雲。號慟山谷。豈非良將視人如子。人亦視猶父乎。皇帝閱焉。詔贈涼州都督。米粟五百石。錦帛五百段。命都水使者張景佚。備物護葬。遵朝典也。惟公氣猛而性和。量寬而精銳。沈謀可以掩蓍蔡。雄斷可以奪鬼神。故常糴粕韜鈴。芻狗風角。然其樹恩結信。立威用武。烜赫如風濤。震盪如雷雨。戰必克。攻必取。每有奏謁。帝特稱歎。孝文之得魏尙。虜不足憂。太祖之見郭嘉。知成吾事。前後賜錦衣寶帶。文馬素女。爛其盈門。長鳴在廐。感知己之主。陳必死之力。皇情西顧。則九羌。鼙鼓。詔書北伐。則六狄。焚旗。上成聖君之元鑒。下効武臣之素節。其章也如此。夫爲人子。立廟致敬。祖考來格。不亦孝乎。爲人臣。恢疆禦侮。以勞定國。不亦忠乎。若然者。歸義方于先人。揚令名于後代。可也。嗣子英傑。起復定遠將軍。左領軍衛翊府中郎將。假紫服金章。河西節度副大使。英奇朝散大夫。前尙輦奉御。英協游擊將軍。前京兆府勵行府右果毅都尉。英彥朝議郎。前左衛冑曹參將等。或善居喪而過哀。或從王事而奪禮。則知辛賢父子。繼位將軍。祭彤兄弟。並參師律。志本不忘。達也。而新是謀。權也。嘉此武功。創其宅兆。以十年七月。葬于太原。夫人燉煌索氏。祔焉。禮也。皇上念功以惜逝。厚給以遇存。有詔詞人。爲其碑志。介士送葬。卽封征虜之墳。單于入朝。當祭度遼之墓。銘曰。

洸洸將軍。雄略冠羣。平西征北。震戎疊獮。亭障臥鼓。屯田饋軍。仗此白刃。致彼青雲。郭侯宴喜。旣多受祉。元牡黻衣。清廟燭祀。鼎食金奏。炮鱉膾鯉。旣來不庭。有嚴天子。流沙博望。羽林飛騎。河曲廻兵。臨洮舊防。

手握金節。魂沉下帳。千里送喪。三軍悽愴。詔喪禮崇。恩碑義豐。生爲神將。死爲鬼雄。身世一滅。榮華萬空。
祁連之墓。長旌武功。

張燕公集卷十七

碑銘

右羽林大將軍王公神道碑奉勅撰

維大唐開元十五年閏九月二十三日庚申右羽林大將軍持節河西隴右兩道節度使營田九姓轉運十副大使兼赤水大使專知節度事攝御史中丞判涼州都督上柱國晉昌伯薨于鞏亳亭故也夫事君効命之謂忠殺敵榮親之謂勇于星襲月之謂氣逐日披山之謂力有一于此名猶蓋世矧兼其四人何間焉是晉昌所以錯落將星崢嶸山嶽者也公諱君奭字威明瓜州常樂人也父壽因公建績致位九卿臨難守死褒贈特進審塞翁之倚伏達矇眊之浮休老而益壯沒而立名者矣公威聲發于雷泉武毅標于峒嶺小頭銳上猿臂虬鬚龍劍摧百勝之鋒虵矛得萬人之敵拔自行陣果有呂蒙之才拜于壇場不爽韓信之用始仕鎮戍歷班外府及郎將中郎至軍副率雖驟移官守而恆在疆場郭知運推轂河源握符隴右公未登一命事主將之旌麾不出十歲代摠戎之節鉞慷慨之士以爲美談于是自驍衛將軍遷羽林大將軍既督隴右兼統河西結塞垣之十軍佩節制之兩印大田多稼而屯廩百億蒐乘籍馬而鐵騎數萬迺蹈赤山焚鬪幕獵清島驅犂牛喑鳴則七戎辟易烜赫則千里震動亭候恃其長城廟堂賴其神將月獻戎捷歲行軍賞王侯無種屠狗起爲將軍戰伐有功爛羊超遷都尉前後翻飛幕下奮躍行間

跨軍典郡。腰金冠玉者數十百人矣。每至入朝奏謁。升殿論邊。山川險易。立成于聚米。攻守方略。一決于前籌。遙詔置兵。先合漢光之旨。新書從事。暗同魏武之心。故得延譽上騰。風雲鬱其氣色。恩榮下逮。日月供其輝光。常斯時也。躊躇攘袂。三垂可以氣壓。百蠻可以力制。卽敍者。老生之常談。和親者。豎儒之怯計。安足爲神武非常之主道哉。誓請先拔犬戎。次繫獯鬻。盡區域于西海。關郡縣于北荒。輝皇靈于天外。圖壯節于雲閣。其事如果。曠古未儔。惟君知臣。保斯言之可復。何神與善。負厥志而無成。是年秋八月。吐蕃犯邊。瓜州失守。盜憎吾將。執致其親。公以爲背父立威。非孝也。頓兵從敵。非忠也。大義逼其忘家。方寸亂其供國。其定計也。成列而出。討賊盡狄。而退殺身。忠在孝先。將之道也。公馳驛要謀。而回紇內叛。以八九之從人。當數百之強虜。然猶虓噉擊射。殺傷略半。亭孤兵盡。流矢橫及。所謂仆而餘威。折而不撓矣。嗟乎。嘗膽之憤。空結。噉肝之怨。莫離。天子聞之。黯然興歎。人言以命許國。夫豈忘其言哉。苟收必死之忠。焉問不虞之過。至矣。蓋聖主推仁。恕于天下。懸大信于後人。愛欲其生。懲晉侯再克之喜。惡傷其沒。抱秦伯猶用之誠。婉獨見之端。豈常情所逮。謀臣飲恩于望表。猛將感德于事外。然後任人之固。衆可知也。乃下詔追贈。特進荊州大都督。禮命。窳加常二等。死事之經也。公之伉儷。曰武威郡夫人夏氏。韓母築城之智。孟光舉臼之材。拔棘解圍。三軍懾其健婦。崩城慟哭。四海傷其孝妻。此又間代之一奇。一家之兩絕者也。嗣子尙衣。奉御承榮。天獎賜蘭。星祥名寶。禮義形于喬梓。哀戚過于縗麻。稟訓帷堂。克持門戶。特奉恩旨。收其二蔭。飾柩玉關。歸魂上國。以十六年十月。詔葬于萬年縣見子之原。鹵簿齊列。方相雙引。京尹護喪。

史官頌石千乘送葬觀驃騎之威儀十里開塋識龍驤之邱墓銘曰

合衆在仁。正兵維義。將爲天目。國命所寄。曲乃老師。輕實兒戲。安我封略。才難不易。赳赳將軍。貔貅絕羣。超騰白地。駕鳶青雲。朝盛勇爵。家榮戰勳。衆聲飛譽。帝曰予聞。予聞伊何。甲兵繕肅。屯積萬庾。馬量百谷。甘心犬戎。指掌獯鬻。大畢當阡。單于可掬。壯計先達。王師未張。城隳孤塞。寇及高堂。忠先孝後。拒敵而亡。外仇易復。內變難防。克日將戰。呼天不假。岑彭詐客。張飛帳下。流鏑何人。交錢去馬。蒼黃反覆。哀哉命也。美殮姑臧。寵歸芷陽。東都門外。南登路傍。高墳壘壘。列樹行行。父子同兆。何殊故鄉。詔刻金石。義形意氣。隱善必書。殤魂不諱。事弃忠在。生輕節貴。嗟爾明靈。銜恩永慰。

撥川郡王神道碑奉勅撰

珠玉無遠。而登輦輅之飾。寶也。松栝無幽。而入殿堂之構。才也。物貴其用。人亦如之。撥川王論弓仁者。源出于正末城。吐蕃贊普之王族也。曾祖贊祖尊。父陵代相蕃國。號爲東贊。戎言謂宰曰論。因而氏焉。公有由余之深識。日磧之先見。陋偏荒之韋毳。慕上國之衣冠。聖曆二年。以所統吐渾七千帳歸于我。是歲吐蕃大下。公勒兵境上。縱謀招之。其吐渾以論家世恩。又曰仁人東矣。從之者七千人。朝嘉大勳。授左玉鈐衛將軍。封酒泉郡開國公。食邑二千戶。周語曰。犬戎樹敦。守終純固。今其俗獷而輕死。其法折而不撓。故前代無降人。中土無僮僕。自公拔身向化。首變華風。澤潞之間。始見戎州矣。若夫河南胡苑。坰牧所利。每歲冰合。虜騎是虞。中軍必謀于元老。亞將固選于時傑。神龍三年。以爲朔方軍前鋒遊擊使。景龍二年。換

左驍騎將軍。開元五年。兼歸德州都督。使皆如故。八年。遷本衛大將軍。改朔方節度副大使。公之理兵也。堅三革。利五刃。偶拳勇。齊足力。信賞罰。分甘苦。六轡如手。千夫一心。接獯獫。猶蚊蚋。臥沙塞。如衽席。薦居露食。垂二十年。雨畢而成師。冰泮而休卒。寒氣入于肌骨。夜霜入于鬚鬢。人不堪其勤。公不改其節。韓公之建三城也。公洗兵。諾真之水。刷馬。草心之山。以爲外斥。而叛徒安堵。鄭卿之和默。啜也。公授館。李陵之臺。致饗。光祿之塞。以爲內候。而賓至如歸。九姓之亂。單于也。公四月度磧。過白檀林。收火拔部帳。納多真種。落彌川。滿野懷惠。忘亡。漢南諸軍。蹙其計也。降戶之叛。河曲也。公千騎奮擊。萬虜奔走。戡翦略定。師旅方旋。而延陲蹶蹶。復相嘯聚。上軍敗于青剛嶺。元帥沒于赤柳澗。公越自新堡。奔命寇場。贏糧之徒。不滿五百。兇醜四合。衆寡萬倍。公殺牛爲壘。噉寇爲餉。決命再宿。衝潰重圍。連兵蹠踵。千里轉戰。合辭訥于河外。反知運于寇手。朔方諸軍。壯其戰矣。研摩之奔也。邀于黑山口。覆其精銳。市惠之背也。追至紅桃帳。掩其輜重。乳泊之會。剌蘭池之狂胡。木盤之役。縲方渠之逋寇。凡前後大戰數十。小戰數百。算無遺策。兵有全勝。是以六狄逃遁。三垂又寧。聲暴露于天下。業光華于代載。信皇威之所加。亦武臣之力也。故錦衣寶玉。允答戎功。甲第良田。不承錫命。語其智効。未甚優寵。黃頭黑齒。比價齊名。積戰多瘡。累勞生疹。恩命尙藥。馳往診之。晉豎以深。秦醫無及。十一年四月十五日。薨于位。享年六十有六。制贈爲撥川王。稱故國志。其本也。太常議諡曰忠。由舊典。昭其德也。長子盧襲官。封繼事業。次子舊久。特拜郎將。十二年四月。詔葬于京城之南。懷遠人也。太常鼓吹。介士龍旆。虎帳貂裘。封犂殉馬。吉凶之儀舉。夷夏之物備。長安令摠徒。

以護事。鴻臚卿序賓以觀禮。哀榮之道極矣。君臣之義厚矣。有命國史。立碑表墓。吾嘗同寮。敢陳遺烈。銘曰。

黃河接天。清海殊壤。舉世安裕。拔俗誰放。倬哉論侯。利有攸往。奮發橫絕。搏空直上。以衆款塞。因敵立勳。吐蕃萬戶。吟嘯成羣。精感天地。氣合風雲。既封酒泉。乃位將軍。朔方陰塞。直彼獯虜。帝命先鋒。闔如虓虎。山北加電。漢南擊鼓。十數年間。耀國威武。我有師旅。將軍鞠之。我有邊疇。將軍育之。柳澗亡師。一劔復之。蘭池叛胡。三戰服之。武節方壯。朝露不待。王爵送終。宿恩未改。時來世去。人亡物在。銘勳謚忠。以告四海。

唐故高內侍神道碑

孝足動天。義堪變地。河中見三州之姓。炳彼精誠。南亭聞再逢之母。彰茲奇事。不有陰德。曠代誰鄰。內侍高延福者。將軍力士之慈父也。粵自西雲。下呂東明。銜璧以亡王之族。處巷伯之官。而將軍本繫馮亭。代家南越。未知父母。來奉宮闈。老而無子曰悲。幼而失親曰苦。調之悲者。笙磬異器而同音。貌之苦者。秦胡別狀而共色。從此斷金合要。投漆相受。承順無違。日嚴生乎本性。仁慈匪飾。天屬由乎自成。父子之名。既定。姓氏之目。因移。大將軍之家。去鄭而取衛。平原侯之室。變郭而從甄。亦猶是也。旣而內侍以鴻漸登朝。苒蒨朱紱。將軍以龍樓得主。豔耀金童。其訓子也。溫室之樹無言。車中之馬數對。其事親也。三牲有養。志之樂。百行無匪。疾之憂。至矣哉。高氏之子也。以思親之願。爲展親。以欲報之誠。而報德。神明翕而哀懇。荒裔疎而慕義。乃有傍求聖善。提挈炎洲。二紀積離。萬里遙至。音容莫識。涕淚茫然。驗七星於子心。認雙環

於母臂而後深傷頓感。若墜谷而登天。蘊怨都除。類愈朦而覩日。於是盡歡二媪。兼敬三人。均養之恩。咸不寐于十起。反哺之志。齊色難于一堂。羣公賀虞潭之親。天子歎馮勤之母。此復然矣。內侍事主四朝。歷官七政。專良恭肅。著美綸言。冲謙儉讓。得名朝列。年六十有四。開元十二年。終于來庭里。明年五月。葬于長樂原。繼子力士。喪孺慕而加等。葬盡誠而備物。義方之經。鬱爲稱首。孝德之傳。今見其人。永維先恩。追綴餘烈。若夫慈羈旅之稚童。仁也。約詩書之尊教。義也。貴不居而要避權。禮也。生推心而死有託。信也。仁爲德本。義爲行先。禮爲身宅。信爲意田。故仁之報也。壽。義之報也。樂。禮之報也。安。信之報也。順。履順居安。乘樂享壽。此四者。生人之偉事。自求之深致者矣。於戲。領賜冠。馳寵勢。偃蹇谷上。煜爚君傍者。豈不思景行高山。慎視前轍。如或少選亡禮。顛沛違仁。瞻言四報。咫尺千里。揚芳樹淑。其不難乎。予固春秋之徒也。懲不濫而勸不僭。義重天綱。孝崇人紀。樂諄諄之成訓。善哀哀之克子。不著倚相之書。將受邱明之恥。九原上。千月深。覽碑版。傷知音。有以見古史之心也。銘曰。

高堂樂未散。重壤哀已擗。寶帳吹靈衣。金樽照塵席。苦長夜之易泯。怨寸景之難惜。刻義聲與孝心。萬古千齡傳此石。

大周故宣威將軍楊君神道碑

公諱令。字令一。太州仙人掌人也。隋司徒觀王之元孫。周孝明高后之歸孫。今司衛卿之元子。維有隋接三統。建萬國。我高祖以同姓爲王。維皇周敦九族。敍百官。我諸楊以外戚而貴。公體元黃之純粹。承河山之

不緒。孝乎內炳。忠焉外均。性與天和。道合仁愛。收恤孤老。分產疎屬。汰于周施。約于妻子。加以樂善而好學。降尊而容衆。能辨樂和。思柔酒德。容止可度。溫溫如也。文章可觀。彬彬如也。淵英皎穆。當世碩士。與之遊焉。而曰君子。若夫漢魏舅族。有恩澤之封。公卿門子。有良家之侍。公浮雲世祿。匪石儒風。究乎王道之紀綱。明乎人事之終始。年十九。舉進士高第。授潞州參軍。轉千牛胄曹。遷洛陽尉。從班次也。居無何。拜朝散大夫。行通事舍人。俄而加太中大夫。檢校天官員外郎。夫行人之在周禮。方國是接。公修其政令。帝曰。余嘉郎官之著漢儀。列星是應。公司其典故。時稱邦則。國家左賢右戚。一文一武。以公地望羽儀。寄深虎旅。除宣威將軍。行右衛翊府郎將。僸俛從事。非其好也。初。公時爲郎也。遼戎悖逆。作患幽冀。皇上噢咻下人。故我有神兵之役。選達權靡鹽之吏。佐猛毅維城之師。乃下制以公爲兵曹焉。實有密贊軍政。獨飛長策。豈云卒乘輯睦。戎機式序。若此而旣哉。俾雷霆颺動。剿慝殿邦。威元免。懷黃龍。馬未汗而狄盡。人未疲而兵輯者。公與有力也。及班師振旅。冊勳踰時。帝用咨有司之違古。念有功之未祿。將遷德命。需多敕有日矣。方當翼大化。增三光之明。熙天秩。垂九德之聲。昊天不惠。厲氣流行。如何斯人。胡不眉壽。年四十一。聖厯元年夏六月辛丑。遘疾而卒。嗚呼哀哉。梁木未施。子道不究。呱呱稚嗣。仰號蒼穹。哀哀嚴親。惴臨淵谷。遐邇寮舊。暨乎欽風。未識之徒。罔不盡朋悲而輩歎矣。天子憫然。弔之以玉冊。贈之以錦衾。羣公傷然。誅德於素旆。圖像於青史。粵乙卯。假葬于合宮縣平樂鄉之北。阜郭門十里。卽山西崗。巒萬古之阡。都邑九原之地。隧寄新隴。魂懷故域。藐視諸孤。未遑歸葬。平生志事。孰已焉哉。厥弟五人。比才連譽。曰踐一獻。

一循一惟一尚一等。因心則友。世稱萬石之閨門。死喪之戚。吾見伯淮之兄弟。僉曰。我圖後事。日月除乎哉。龜云。此地陵谷居乎哉。乃布哀友生。托詞懷舊。跡德表墓。示之來昆。其銘曰。

洪河南注。少華西峙。氤氳靈會。生此君子。生此君子。維國之紀。宣慈惠和。禮樂文史。敦錫崇類。激揚嫩否。勤然濟物。若不由己。克明從訓。誕敷厥美。修詞北闕。潤色東里。揮翰文昌。列星順晷。交戟禁衛。爲王爪士。允文允武。翁歸是比。疇曰禦寇。諗軍北鄙。攘狄黃龍。濟師蒼兕。將王元默。繫公是恃。帝懿乃勳。將圖撫什。仇仇執憲。不我力以。役役大勞。未受多祉。景命無祿。洪基中圯。父兮葆鬢。孤子稚齒。孔懷靡及。凡伯瘁止。陟彼邛山。邱墟歲礫。荒草無際。羣哀所起。吁嗟楊侯。託居此矣。沕瀟綿曼。德音不已。久客思鄉。永懷桑梓。

唐元城府左果毅贈郎將葛公神道碑

公諱威德。字某。曰葛氏。京兆涇陽人也。其先嬴姓。咎繇之後。夏有葛伯。氏族興焉。寧陵之傍。尚傳侯國。綏山之下。獨有仙祠。嬰則威服五城。襲則績稱二縣。鴻臚秀於吳會。散騎崇於晉景。在其子孫。是宜繁羨。公生而開朗。長而英拔。非因馬鄭之學。動合禮經。不待孫吳之書。暗同兵法。有拳勇。尚氣槩。顧盼稜華。風神都爽。五馭善於東野。六射勁於西霜。少以嫖姚之才。入充供奉之選。御橋驂駕。犯清蹕而不驚。輦道啼鳥。應鳴弓而自落。便蕃左右。星歲重深。賜上柱國。拜元城府左果毅。天下大定。李廣之用無施。雲中薦賢。馮唐之言已老。春秋六十五。神功二年某月。終於洛師。藁殯邛阜。夫人太原郡王氏。夫人郭氏。實生大將軍。福順一見聖主。再紐乾綱。重位冠乎北軍。茂功歲乎南史。故象服臨祭。魚軒以朝。天子深嘉。歎馮勤之母。

羣公列拜賀虞潭之親。享年七十五。薨於京兆之三真里。公愛敬奉親。軌則可移於後代。義方訓子。福祿來及於先人。葬有日矣。乃下制曰。禮著飾終。情惟悼往。詢諸前烈。抑有舊章。前左羽林大將軍葛福順。亡父某。守其謙素。宏此藝能。未展才術。奄從凋殞。而嗣子克家。式昭勳業。旣念功以追遠。亦自葉而流根。宜申獎贈。俾慰泉壤。可贈遊擊將軍。守右驍衛翊府郎將。開元九年二月九日。葬我郎將君前夫人王氏。後夫人郭氏。耐焉。禮也。章帝以旒輅。旗在列。廟食備其牲牢。法葬陳其簫鼓。孝慈之道著矣。哀樂之禮畢矣。尋彼生平之事。忽如絕光。繫乎碑版之文。永存遺烈。銘曰。

鏗鏗都尉。角立傑豎。神銳玉劍。氣雄金鼓。六藝爰設。射馭爲武。百行雖名。忠信爲主。時不兼命。位不充才。善流慶答。身謝榮來。太原棣棣。寓惟嘉偶。羽林桓桓。克大其後。

唐故廣州都督甄公神道碑

君諱竄。字道一。中山無極人。昔胡公紹舜。奄有大邦。楚子縣陳。逃威樂土。當烈王之王也。有陳通奔周。王以爲忠。將美其族。言舜居陶。甄之職。命爲甄氏。錫姓因生。如堅之讀。形聲轉注。以真爲音。處則稱劉。明歸晉者。以異變而爲郭。蓋承統者有馮。通之裔。邯仕漢。爲太保。大司馬。承陽侯。邯十六代而生鷲。仕齊。爲太山太守。司隸校尉。無極縣伯。撰笑道論。行於代。鷲生隋汾州刺史族。族生隋沁州刺史紹。紹生隋新市令協。協生單于大都護府錄事參軍。贈宋州刺史。封惟祖。惟曾在商。在夏。世濟其美。永觀厥成。君卽宋州府君之第四子也。博綜經史。脫略流俗。情之所遺。對咫尺于千里。氣之所重。輕百金于一諾。曰興曰比。階應

劉之閫奧。或草或真。藏鍾張之筋骨。譽滿鄉曲。聲聞闕庭。天后臨朝。再加寵命。皆辭以親老不赴。逮疾革。易簀。骨立廬墓。復有制徵焉。刺史獨孤楚。率府寮敦喻。起于墳左。乃授左金吾中候。生盡其養。豈違親許。人沒盡其哀。方委身殉國。或用或舍。有以見大君之仁。時止時行。有以觀大孝之節。君臣之際。其遠矣哉。尋除左千牛長史。檢校武始軍長史。攝右臺侍御史。兼靈武道行軍長史。攝右屯衛。鄜將。副臨洮軍使。轉右驍衛右郎將。爲臨洮大使。拜蘭州刺史。兼榆林臨洮等軍大使。除夏州都督。兼鹽州防禦使。徵授幽州都督。衣之以紫。攝御史中丞。爲河北軍州節度大使。君政成周月。惠則在人。患是緩風。表以去職。未幾復除夏州都督。屬山戎矯虔。倂擾王略。兵落天上。思迴行以出奇。虜墮計中。守便宜而未進。時以爲逗遛。貶撫州刺史。朝廷明此舉也。未到官。遷廣州都督。兼嶺南按察五府。經略討擊使。春秋五十有七。開元五年七月二十八日。終於官舍。以年月日歸葬于恆陽之王公山南原。不忘本也。君三承辟命。再攝憲曹。八典戎旅。五司藩翰。事之去就。所歸必執其中。職之高卑。爲政各當其選。觀夫果子事。喻于義。下學而上達。強立而知類。畏克厥愛。道無常師。有商也之文。有求也之藝。習禮必本。飾之以精華。積行必崇。茂之以枝葉。以此探蹟。則投刃皆虛矣。以此効官。則操刀必割矣。是故羣士之所鞅掌。而君之所綽約。常情之所戚戚。而君之所蕩蕩。由是言之。槍榆之與海運。鳴琴之與星入。從可知也。惜其志懷慷慨。雅多大略。援桴作氣。有七縱之能。孤劍無前。當萬人之敵。竟不得橫絕漠。騁雄算。刮狼星之履。鏡乎太清。卷瀚海之波。靜而可掃。駸駸之足。受羈馱馱之途。堂堂之貌。不畫麒麟之閣。彼哉彼哉。有遺恨矣。其孤某等。望兮不至。求兮不

得永懷揚名庶慰罔極銘曰

有鰥在下陶復河濱元女作合相攸于陳楚爲不道祚以永淪周寵忠節氏以初因不惟承陽致君論道
施及無極建家載考彼汾彼沁伊時之寶宰兮牧兮亦孔之好積慶潛演俊又挺生標格磊落氣志清明
八司戎事厥謀有成五刺方伯厥政有聲山有杞梓工思其度國有孫吳君思其略弃德珠浦遺氛沙漠
惜哉不當今也可作恆岳臨北滹沱注東仁不忘本孝亦令終壽堂盤薄牧子克窮勒美松隧穆如清風